



大泌山房集卷之九十一

京山李維楨本寧著

封禮部員外郎岳公墓志銘

余嘗爲樵李樂東湖公金孺人志墓而後從其孫今顛
郡守爾律游甚歡則益悉其家世濟之美蓋宋忠武鄂
王仲子緝忠侯霖霖子鄴侯珂勸農嘉興路賜第金陀
坊珂子承事郎覲覲子江夏丞邁邁子監酒庫涇涇子
金部主事琳琳子茂之再罹胡難更姓樂播遷長水鄉
茂之子貴一入明爲廣東提舉貴一子尚德尚德子武
功衛尉仁富仁富子懋懋子端端子梅溪公奎奎子松

巖公鳴迅鳴迅仲子東湖公商東湖公娶金孺人生伯子封虞衡郎心夔公九德仲子則封祠部郎青門公九臯東湖公與金太孺人孝義詳志中而復岳姓自兩公始青門公少心夔公十九歲長心夔公伯子水部公六歲幼慧不爲諸兒戲父母愛之甫齠失父哀且毀孝因母而敬伯兄視水部若兄弟然心夔公課子弟嚴日不中程繼以丙夜母慮弱劣不任私垂泣則謝曰是奚足哉人所學大人有二其一爵其一德兒卽不爲尊官稱大人不失赤子之心卽大人也母哂而竒之已數赴童子試不收旣冠而娶張宜人方是時父困官私受侮心

夔公經營盡瘁公拮据贊之再赴試復不收遂棄去獨好讀子史及稗官藝術諸書尤精岐黃家言居恒語宗老人生寄耳要自有不朽者夫惟至人養空而游無往不得其性命之精與心夔公相率奉老氏三寶而時御母板輿游田間致足樂也會心夔公喪仲子其母張宜人哭之不安寢食徙宅禾城母以兩子兩地心殊怏怏水部旣通籍公乃奉母入郡心夔公居郭東公居城西過從必移日夜則同寢絕無跼蹐鳴琴陸博呼盧之好卽杯酒燕語以立德立言訓誨諸子求田問舍者關口守登第水部爲國子先生諫

上暴怒所收闈人采女朝生暮死

上嗾之將置重典以慧星見解已東事孔棘而婁江再相不卽赴彈劾爲大不敬衆竊危之心夔公念伯子委質事君父不得而子卽遘禍奈何而公入京省動定則守成進士矣命之曰自忠武後子孫久隱畏約無窮時若兄弟食舊德無忝先人可耳守敬諾已慰藉水部兄嫂日夕念汝且死諫而得無恙事君如事親其惟今日水部敬諾日與辨晰經史微言古今大事朝家典制四方利病計畫便宜老師宿儒無及者守應除令公曰年少不習爲吏宜暫家食從事問學因以移病請公携歸

偕心夔公朝夕侍母忘憂忘年矣守將謁選人別太母太母泣吾七十有三汝父諸兒大者侍從承明領民社小者有聲鄉校吾何憂獨未及抱仲父孫爲是介介耳旣拜汝陽令太母卒公兄弟號咷骨立耐葬東湖公則松巖公墓隧毀舍日就圯以訾效之兄營繕而服屬喪多未舉無所得地公呼猶子士元等曰吾有一坏土在張字圩可以葬葬者數輩宗人德之泣下資饑寒不時婚嫁者有鬻墓坊四十年再易主而重購以新之弟躍川公進用不饒而能行義母以數千緡不取子猶子政聲廢其產室人交謫亦以橐金爲衣食業三詘無所問

畀甥王叔吉室而廩穀之使從師屬文仍予之田嘉都氏甥屢空能奉母也亦予之田或假金孺人簪珥付質庫不能取倍直而歸之妣氏田所入不足食推食食之田相錯者高其直操書致以來而竊自傷曰舍是奚食也聽其耕如故傭屬收責盜而挈其孥走豪所豪虞見法賁之顯靈祠當濮鎮萬家扼塞以田一區治之鄰以四晝售數十緡復質其三則他售矣憐而還之故廬側民田瘠歲不得種捐千斛做常平倉法濟之鄉人子不學捐三十斛延師教之此兩事則守所奉行也自是肺腑之親葭莩之故生有養死有歸遠近橋梁梵宇工無

不似給公矣公緘篋筦鑰凌雜米鹽卽偶張宜人藉手宜人亦婉孌從志抱衾稠者賦予布帛有尺度身無褸衣甘食家以此增于往水部三疏斥大司馬東封失策及奸人沈維敬當誅忤旨落職歸公過飲心夔公而勞之伯子于三王並封而諫于閩功郎外察而諫于今疆事而諫三諫而不從并榦死服事兄里中宜爲兄壽心夔公曰君恩隆天重地敬舉弟之觴公有女相攸姑夫周廷評以沈純父先生猶子白生對公曰吾固心儀之筭而字白生連得雋已歷水部察廉調勲部歷郎中孜孜覈廉貪明邪正風裁甚著而人知公有人倫鑒勝

冰清玉潤也先是公患疥癩已感寒疾寤中若有示者遂起謂張宜人醫之所病病道少人之所病病疾多吾夙好養生七日不汗分必死而神佑之然恐其鬼之終餒也或謂公年甫強多行善當有令子公曰禮有之兄弟之子猶子也而守以令擢客部歸公請於兄曰弟少孤賴兄與嫂有今日兄多男而弟蘭夢寂然女雖有家不可以爲子願以仲子和聲爲後心夔公曰太蚤計作人如弟寧憂無子吾欲無從弟言而弟迫有子姑以吾子爲弟子先導于是守後公矣以建儲恩封公爲主客郎而心夔公夫婦喜曰是可瞑先人地下目也守使淮

王邸便道覲父母兩父兩母俱存無故鄉人艷稱之無何心夔公卒守䟽言爲人後者不得顧所生如三年之愛何請得予告持服如子且以爲人後者式而公痛吾兄不及被若服物采章賴有此吾少安歲時操卮酒酌伯兄所淚潜然佐水部兄弟治葬守復除遷儀制員外郎再值覃恩封公如其官而以其官移贈心夔公兩安人皆晉宜人公念兄愀然不以喜而以悲也郡以鄉大賓禮禮公爲一往再命則辭而水部季弟舉京兆其母慮無以供資斧公又助之亡何守喪其生母復請執喪如心夔公而公哀嫂如哀母恤兄諸孤倍篤改營虞衡

公墓于武康銅官山道阻遠守浹旬一歸省公不可若
自令爲郎遭迴十有五年兩遭大故匍匐萬里弱質不
耐勞且未舉子無以我故僕僕也其年五十宗姻以始
壽賀越月置酒相報稍劇已患瘍又苦劇三月手足幾
萎則白生亦在告子婿兄妹旦夕侍疾瘳矣白生補司
封郎公趣守北上守不應踰年而公愈壯趣治行益力
守單騎入都留其婦居子舍而孫慶濤生公益喜季有
聲復舉進士公遺書相勗兄弟俱朝臣婦若女俱命婦
乘至盛而不返道理難與長處樂矣尚念之哉而富平
爲太宰心望水部補救外察已內察移於浮辭疑守好

異同不相中出之慶遠諸清流皆爲恚憤而秦比部疏
論救不當察者七人守與焉富平辯數是不愈謫籍耶
何以鞅鞅觖望故相反駁守乃歸而阿邑者復造作飛
條嗾南臺刺守并及白生守請休富平持其章不下公
語守讒夫高張攢耳而聽兒行矣不則謂羞薄二千石
詔除畏陸梁地有他覲而以二百金與張宜人爲守辦
裝曰以成其廉也守不得辭復留婦與子子舍而身如
慶遠甫兩月移贛州會有寇百姓恟恐禍挈未解守不
得輒代而以計降諸夷傾巢舉落望德如歸倍兵罷去
公竟以故疾卒白生與水部兄弟相守之婦治喪事甚

備蓋家無常子樂氏有古人風非朝夕矣公生嘉靖戊午七月二十有三日卒萬曆壬子五月三日年五十有五配張宜人歲貢生張公楨女子一卽守名和聲娶鎮江別駕周公志學女累封宜人後公十五年以勞卒女一適驗封郎中沈孚先白生其字後公十月卒孫男一卽慶漳未聘孫女一未字水部名元聲季弟名駿聲皆以文章氣節知名于時銘曰孰不有父察父難爲子而少稱孤子而父是似孰不有子令子難爲父而子兄壤子而穀式汝孰不有兄哲兄難爲弟而兄年長以倍而名實相儷所子者疏爵而貴矣非子者踊不絕地矣繼別爲宗引無替矣生也帝命之藏也史志之矣吁嗟乎岳公不顯亦世矣

贈文林郎官公墓志銘

故黃州郡諸生贈漣令官古愚公今諫議東鮮父也東鮮舉進士令宛五月餘公卒服除除漣以考最贈公如其官尋以高第徵拜諫議蓋葬十有二年而始以狀介其友秦民部敬伯屬志銘于不佞某某辱在鄉人之末知官公父子稔矣志曰公初名惟德更名如臯字直卿其先行三公自江右徙黃岡烏林元末避兵再卜鄱陽數傳至守忠守忠子清清子政政子永富永富子徵

仕郎公某里人號長者以子高唐貳守祿封配汪孺人
祿母弟福質直好義七十爲三老賜高年爵配王孺人
則公父母也王孺人夢麟入懷而公生小字夢麟六年
而孤自少儼若成人塾師試以偶語敏而中比長善舉
子業之文所師陳公馮公黃公遜其能公益自奮夏席
地冬絮暴脛夜誦不絕聲二十九補郡諸生探窮往籍
游思玄微丙子巳卯試兩見格蓋直指郭公讀其文以
爲鉤深而近苦揖之于庭口勞之仍旌其門後直指張
公郡伯鄒公都試士皆爲冠首然卒不第甲午東鮮舉
鄉試第二人嘆曰力何可與命衡有孺子在吾其休矣

與同志數輩締文酒之社手錄唐人詩而擬之情景所
觸題詠不輟疾革猶爲重陽詩一章信則人任焉制義
一首其篤信好學如此事父母孝所受生徒月奉以治
酒食洗腆而進之有所得果蔬非親嘗不敢先四時之
服必備純麗子弟環侍陳說今古父母解頤抵掌也中
夜數伺喘息小失節醫藥禱卜皇皇如不及父受爵通
國人美公能子公謝不敢當旣而曰愛敬其親則子悅
非人情乎張筵酬賀者浹旬且以奉親歡母疾時東鮮
復患疹公不顧專意侍母籲天請代居喪哀馮而能立
扶而能起哭無常時常聲者終其身事繼母張如母愛

季弟共釜而炊四十年衣服器用擇其所善而爲之季
弟子孝廉受室室隘不可容將析箸兄弟涕泣數日烏
同翼而聚居獸同足而俱行而況于人乎不遠伊邇式
相好矣孝廉齟齬能文愛之教之如東鮮姊歸曹而寡
生死于公乎資從昆弟子貧者因能授業無俾失所或
凶年自鬻出金贖者四人配余程兩孺人父母兄弟瞻
護尤厚姻黨知故振饑寒救死亡甚衆自奉蔬食菜羹
裋褐劇屨不敝不更程孺人卒家復燬人所不堪猶賦
詩自樂也平居立坐步趨不失尺寸對衆無媒言小人
女子不假嘖笑料事成敗十不失一就之謀叩兩端必

竭政議直指卽尊貴有過輒獻規子姓外生則跪之堂
下愧之以辭傷其前事而悔過其行乃解少年遇諸塗
足趨起不前從東鮮京師諸貴人造謁謝不見郡大夫
過存亦不出初治戴記兼尚書四遠負笈之士不問脯
修其不若訓雖年相若不廢夏楚門徒登賢書薦南宮
若諸生升米廩殆半國中卽有叛不忤師者不較也所
僦居火或謂某將嫁禍公盍聞于官笑而不應有竊賣
家人子者收之或謀竄奪以言餽公公唯唯豪侵程孺
人墓田顧倍予直隣構室其子厭死以爲訟端諭而平
之東鮮觀大司馬政遺書言北虜南倭滇緬蜀播粵徭

往往變告四方被甲砥劍理檐蔽舉衝櫓守亭障者參
列旌旗羽毛裊敝粟糧漕庾萬萬餘子之力盡于溝壘
邊境早閉晚開大司馬何方所循擊潰而決天下亂不
能治危不能安無爲貴知士也東鮮轉餉遼東取道觀
省公憂形于色曰中涓採權所在罷士露國猶木之有
蠹人之病腹心夫循計之事佚而不累訪議之行窮而
不憂會典律令綱目具在率循何人弊乃至是宜日省
以助經略如宛東鮮退食瑣科條行事平亭獄若干人
無憾而後卽安又言宛孔道飭厨傳瘠下肥上義所不
由然古者立鄙食以守路賓至百官以物至重王事耳

今之寄逕者何莫非天子奔奏臣也致餼授館之不設
是爲茂官豐約適中可矣居之有間病東鮮乞假不視
事亟趣出奈何以我故令案有留贖先一月召季弟及
諸子來令之江陵治木有神附于此曰三千苦海今超
脫清玩蓬萊十二樓公曰東鮮十二吾逝期也宛人戴
東鮮如慈母聞公病謁款諸神百里奔走如狂唐王亦
偵伺屬路十有二月十有二日木至正襟而坐取筆牘
受言震兒當事雲兒作人耐煩二字謹識之耳某某往
有德于吾父母吾不及報其無忘二子泣呵曰吾返吾
初幸甚母怛化遂瞑其歲萬曆己亥距生嘉靖壬寅四

月三日年五十有八元配余贈孺人繼程贈孺人再繼
王程實生應震應雲應震卽東鮮戶科給事中邦之司
直也娶隆安尹宋德祈女應雲邑諸生娶儒士鄧蓋女
孫五震出者撫辰郡廩生娶蘇郡丞盧國楨女撫極諸
生聘高平尹洪聲遠女撫邦聘平度州佐周啓孫子戶
部郎之訓女雲出者撫蒸聘曲靖郡丞汪守濂子太學
儼女撫華未聘孫女二一字蘄州贈都御史李儒子叅
議際春子諸生扶一字蘄水布政使朱彥子戶部郎期
昌子諸生朝熊俱震出壬寅十有二月十有五日葬金
羅山東鮮狀云少善病公鬻子閔以父爲師未嘗就外

傅旣冠且舉子不小姑息遠遊必偕唯恐失足旣慟母
蚤逝不逮養父逮矣爲日幾何生平文學德行宜有豐
享而遺佚阨窮特甚晚歲逢疾備諸荼蓼凡數千言殆
不堪讀稍節之而爲銘曰孺慕其親要之沒齒是爲孝
子千里迎弟與訣死生是爲仁兄子優于學惟父範模
是爲大儒將子牧民民戴其賜是爲循吏一人之身備
道全美足張楚矣年不登耆以青衿終罔怨罔恫帝賚
諍臣龍章在櫝旌此貽穀沒而不朽令德令名賁于九
京史作銘詩樹之墓延如山無騫

待贈承德郎張仲公墓志銘

安定張立庵先生爲丁未進士魁所居官以清白稱守
黃守郎之政余耳目覩記爲悉卒以直道不容官止蜀
憲副歸余部隴右則公已沒所居財蔽風雨令人肅然
起敬公諸子多才儁方困逢掖中久之伯子某某公袞
舉鄉試第二人又二十餘年仲子某某公子成進士除
民部郎蓋先生貽穀之慶也仲子名辰字某某於孝廉
爲同產其三弟同知興國裏諸生廩於庠者裘宸則如
母出也公穎惠絕倫二歲從先生官上黨所過山川道
里廡置若城郭解宇園亭久而不忘指畫成圖先生嘗
以句屬對晚霞高掛無煙野火燒空應聲曰新月初懸

沒線銀鈎鈎海平涼趙中丞浚谷公者先生受業師也
聞其竒使侍立而試之曰一日心存十二時對曰九重
策獻三千字又故難之曰秋雨連綿簷前如奏九霄音
丁丁當當驚迴幽閨淑女夢夢不成夫戍蕭關對曰春
雲縹緲空中似放五毫光往往來來動起他鄉游子思
思無窮親在天涯皆如響答桴中丞大稱善謂先生吾
甫十四而鄉薦十八而魁天下若子七齡才若是當踞
吾上若殆難爲父矣而先生虞其速成知畫盡此耳督
課嚴汗血之足束于繯牽不得騁以故爲諸生鬱鬱無
所見竒而父母喪奪饜事然未嘗一日廢書討論六籍

諸子史兵農曆數卜筮方伎百家言叩之如流爲詩文
杼所見解傳以古法薦紳學士貴重之客嘗滿座公縱
談出人意表時雜諧謔雅俗不至疑駭聽者虛往實歸
不欲去每誦其家茂先詩安心恬蕩棲志浮雲體之以
質彪之以文山不讓塵川不辭盈此吾居身之珍也與
人披情素相視恥夫翳行竊步不得其要領詡詡強笑
語謬爲恭敬詐泣佞哀恤喪紀者或有囂競譬說情理
衡無私輕重繩無私曲直雖悍者降心相從黠者關其
口也每希劉伯倫銜杯漱醪無思無慮王孝伯無事痛
飲讀離騷家無十日之蓄日儲酒召客卽無客陶然獨

醉不復問生計所知諷公宜小織齋公笑曰夫數粒而
炊析薪而爨偏恡細碎空自苦耳何救于貧吾少本如
此豈可一朝而變非欲異物性所得也人有患難窘乏
傾筐倒笈資之唯力是視然不欲得好施名人受其賜
身乃大偏側家人交謫終不顧貌魁岸廣穎豐下神采
儀容朗然若明珠照乘和氣盎溢面目間外不飾邊幅
中不施肩鑰人樂親之生死貴賤不易交情里中故推
爲祭酒晚以子貴忘年忘分延接殷勤袁絲與問閭浮
沉相隨行馬少游下澤款段鄉里稱善殆有過之矣民
部初以轉餉出塞便省覲公已還報命請公俱北公喜

吾家世受國恩從兒一詣闕下頓首祝
天子萬壽幸甚民部領潯陽權政趣之行君命不可宿
於家吾當一覽匡廬彭蠡之勝既至邸訓勅民部吾聞
諸先民不取于人謂之富不屈于人謂之貴貪者常憂
不足廉者常樂無求若王父以不貪爲寶百世之師也
吾雖布衣明習故事收錄遺文條奏前世善政法度可
施行者民部奉其言輕關薄斂頌聲大作而會歲旱災
灼如焚官署濱江囂塵湫隘乃命駕之遠公東林曰此
昔十八檀那之社陶靖節所晚合而謝靈運外望者也
可畢吾世矣左右怪其言三日坐一榻自謂清風徐至

不減羲皇上人俄而卒公平居不佞佛而緇流比丘應
之無靳里中梵宇多所繕作其以東林終也或謂有宿
因云生之年嘉靖丙午十有二月十有九日卒之年萬
曆癸丑六月十有八日年六十有八配王安人某某女
所生男子四人伯國綬諸生娶某女仲國紳卽民部娶
廩生石三樂女叔國綺諸生爲叔父興國公後娶郭某
女季國紘諸生廩于庠娶稍某女女子一人爲諸生康
萬方婦國綬有子福慶父子俱蚤卒國紳有女字諸生
石玠子某民部慟公甫食三釜之祿而遂忽然又以王
父墓自世父外不得耐將更卜兆以葬而屬余志墓中

石余承服先生風聞久且與民部契最深因父知子因
子知父爲志其可傳大略如此云銘曰胡多才兮名靡
成胡懋德兮遇靡亨維察父兮若哲兄若令子兮高閑
閔吾何憂兮復處盈和其光兮銷其聲自隴西兮至滏
城往結夏兮蓮社盟解天弢兮謝塵纓忘身世兮齊殤
彭示無死兮亦無生歸輿襯兮故鄉坐神綿綿兮萬里
行銘于石兮祭于祊帝錫命兮寔窳明世永昌兮莫與
京

儒林郎魏公墓志銘

余兄弟五人惟一女弟最少適魏穎超蓋若六人然而

穎超年亦最少自余有河西之役別且七年壬子夏過
余金陵旅舍相存見其體力佳勝良喜而周思皇自濟
上招之觸熱往赴甫兩月暴卒母大憚人愛婿不勝慟
余深憾不力留行然萬非億想所及賴思皇棺斂雖余
兄弟無以加初穎超摩挲余幼兒欲字以女余亦含意
未發而思皇言其卒之日與談漏下二鼓出復還及兒
女事若託身後者余因白母爲文定櫬過金陵酌酒舟
中明諾而兩甥遂以墓志屬也執筆輒酸楚罷去蹉跎
二年兩甥使人奔告葬有期迺杖淚而志之曰穎超名
實秀以南嶽有赤帝館取爲別號其先江西新建望族

奕世圭組某世祖某游楚至京山有長者聲衆從之如歸市又善治生名田萬畝至其王父贈知縣公某業益拓而折節禮儒碩先大夫爲諸生入邑舍其外館市人奏劇觀者如堵墻先大夫鍵戶誦書聲高徹贈公叩而揖之君厲志學問當爲國士時時餽食飲延之上坐而以其子西安公某見西安公少先大夫十歲先大夫亦知非凡偶也遂締交西安公舉于鄉又三歲生穎超又三歲而女弟生襁褓中西安公來委禽是時穎超白皙娟好而後以疹惡十死一生成麻面魁然丈夫其後才名著人恒呼三麻有別字私印云隆慶辛未西安公成

進士知縣事穎超與伯仲二兄從受書屬文知意日啓而母田孺人卒已西安公復卒先大夫召之與諸弟同學學成爲諸生爲贅婿二年而先大夫無祿卽世穎超執喪如子然後返其室二兄長習事祖父所遺穎超一切不問歲入薄率仰給母氏及余兄弟而以諸生高等當食廩余兄弟有事四方朝夕緩急不相副爲之入貲入太學而更學爲詩詩驟佳金陵諸游客賦新柳以穎超爲第一王司寇趙少宰陸祭酒評目之試于楚若京兆再三不收北游京師當事者將有秘書選以未開局中輟第除典客奉使越中便游白嶽陶祭酒見其辭翰

方幅齒遇已遷江寧丞日與諸知故往還倡和視吏牘
茂如也郎署則曹能始山人則謝少廉俞羨長茂才則
葉循甫館賓則王曰常王不疑最稔署左構十破齋日
嘯歌其中上官檄責何得廢曹務笑曰古有吏隱風流
罪過竊所自甘其任達如此某子甲爲閹爪牙拜內史
徼璽書佐稅事移江寧逮諸富人令碎無以應穎超匿
諸袖使所私昵譬說以禍福事遂解三年考最尋以建
儲恩賜勅命女弟爲孺人而西安公中計典鑄級特疏
請復故官已遷同知河南陝州其民朴而事簡穎超顧
精心于職簿領詳緻上官察其能俾攝靈寶縣縣令有

小出入爲之彌縫嘗決數十年疑獄上官益用嘉嘆而
察京吏以典客報罷矣典客長皆貲郎惟少文恥爲之
下其僚猥雜或白眼直視構爲蜚語故不免上官知其
貧醵金治行士民泣而送者屬路而兩甥已爲諸生娶
婦雖蕭然無資欣然自暢今始解徽纏柴柵從吾所好
矣宅負城而臨滉水南山當戶傍築室數楹圖史凡案
尊彝之屬不侈而雅壘石蒔花輔以梧竹踈密有致好
種柳羅列門外自謂富于彭澤善手談竟日夕忘倦飲
不勝杯勺而家有美醞客不醉無歸良日偕所善登溪
外山或秉燭夜遊間歲買舟南下歷匡廬九華具區武

林觀海日夜生浙江秋潮而返將次第五嶽有車轍馬
跡焉而已矣自六籍外陰陽卜筮韜幹醫藥諸家咸所
涉獵書法二王而能匠心獨妙學士大夫重之慷慨持
論百折不窮雜以諧謔令人絕倒惡俗子爲富貴容及
齷齪小禮者意所不合割席分坐或拂衣起不逢人喜
怒不逐人毀譽貌權勢下孤弱而敦大倫事兩兄和不
廢莊兩兄小有言必婉劑之伯兄以其仲子爲子蓋平
生所愛請于縣大夫博士與邑諸長老僉曰可而後受
命仲兄長子才而天胸懷邑邑曲爲解憂伯兄婿董茂
才元甫美秀而文於之甚至所識窮乏推食解衣不繼

則書一幅使之鬻如虞世南樊卿灌口直低昂聽其所
遭也晚與高僧究貝典節縮釜庾爲萬松庵鳧山之麓
意若有悟其于生死當超然矣余妹未艾而寡諸甥小
者未齒何以自振旁觀竊代爲悵悵耳其卒萬曆壬子
某月某日距生嘉靖辛酉十有一月某日年五十有二
子四人伯九扈諸生娶中書舍人唐應運女仲九敘諸
生卽爲伯兄後者娶光祿監事孫鳴和女繼茂才夏柱
女商城令崇誠女孫是伯嫂姪奉其嗣母命也叔九師
季九官副室劉出未聘女一卽余爲幼兒營國聘者亦
劉出九扈子一某某聘茂才胡栻女虞城令宗淳女孫

女一字孝廉王制子某則余弟之女之子墓在邑南二十里楊柳坡生時顧而樂之語子必葬我于是今乃知其非漫語也銘曰古人論士才或跖弛惟魏家玉之才之美儁無傷道巧無累理風領毛骨巖巖清峙三仕何貧貧且沒齒五十非夭乃以客死貧富死生達觀一耳手蹟永傳神明可起地下修文得新郎矣

光祿署丞吳公墓志銘

光祿署丞吳樂庵公名思沐字新之少而孤苦讀書至孟子所云二樂曰仰不愧天俯不忤人此豈必得志然後可爲哉因自署曰樂庵公父左泉公尚字母汪孺人

九歲失父哭泣過哀家人憐之母鬻子甚閔恒以中夜披衣起泣而語之若先世多名人中葉乃爾孺子能自立卽吾從若父地下遊無憾十四歲母疾朝夕立而侍奉藥物相啓居者踰月其卒也哭幾毀宗人將不利于孺子出外家避之二年歸乃婚十七從叔父賈徐二年業寢虧而深自訟吾謀左耳失之東隅收之桑榆寧異人哉黃氏翁鏗與之語合曰誠如君言事何不可豫道者要與其子澤共事質遷有無得倍稱之息矣更簡兄弟中可任者分屬之徐中水筏桴居屋上而新河成夏鎮扼其吭亟語澤徐不可久處夏鎮灌輸地也澤未決

其翁獨信爲然而析貲兩授之徐果日損夏鎮日益自
是一年而羸三則以其三爲母而授兄弟息之三年而
羸九則以其九爲母而授兄弟息之吳氏業析爲六而
諸兄弟饗其利者數十人已釀金而歲令支屬子姓息
之息以其功勞逸多或千金少亦數十金仰事俯育畢
給鰥寡歲遺帛月遺糈童子遺束脩十五以上召之卹
舍冠婚具禮師友具贄成學成名者踵屬矣居恒言俠
者好施不必當義不當義而施人病不節吾病不繼此
所以廢之何在其所以存之矣吾因勢利導使自爲生
等不相逾六戚鄉黨知交華門圭竇丈夫吾子無貧窶

捐瘠者豈盡出吾橐中哉已創小宗祠修大宗祠一棖
楠一礎切一畚鉞舉臂勝事無不服籍君子以爲得達
孝之指焉因事行義不祈名高其天性然也河滇淤反
壤故菑捷往往觸舟糜碎友胡君謀除之而力不逮公
請其叔父白司空興役司空歎曰此公家事而勞費若
義哉凡拔木石沉舟若干司空旌從父功官以萬戶不
知自公力也知者德公無所窮矣夏鎮岸善崩小刀競
渡多沒復請叔父鳩工爲石隄激舟紆纒維之司空樹
棹楔於路曰汶泗通津慈航利涉云歲饑道殣置十畝
塚若干沛滕以上無暴骨齊魯吳楚間治道成梁諸義

舉甚衆心德黃翁從史翁納妾舉幼子渭而妻之以弟
女澤欲分夏鎮貲公不可以已貲俾之後賈真州失利
更甚獨在夏鎮者澤兄弟中分藉以自全前胡君爲其
所知丐千金而後負之胡君以爲慚公折券兩人交如
初胡卒或噬其三孤兒卵而孚之三孤殤復求後之者
亦妻以從子女良田廣舍光復先人舊物而居僅容膝
非臆臘祭祀無酒肉出入一奚奴從不乘輿馬貴人不
輕投謁在夏鎮惟羅司馬毛憲副姚侍御武林錢公蜀
尹公楊公交驪禮爲子師滑人李公遇之以上賓居鄉
則令劉公宗人益都令鄉人祠部鮑公程公憲副畢公

咸引爲勝友以公排難解紛而無取有魯仲連之義置
酒請須臾焉公研索經史旁及二氏然以人生倫常中
安能逃于其外素位而行下學上達如曰捨之何難二
氏所以不如吾儒也家難而天下易聖賢之學親踈近
遠愛有差等反之則悖間從講學會歸曰不在多言在
實修日知其所亡月無忘其所能可矣以例爲禮部儒
士授光祿署丞未幾遂謝去嘗之會稽探禹穴禊蘭亭
海岱以南佳山水足跡幾遍越十年病就京口醫小愈
促伯子應試病忽棘屬從子書遺言伯子得耗奔而輦
之歸婦請禱曰姑盡汝心慎勿用浮屠少子在夏鎮絕

不言伯子以手相枕呼家僮易之遂逝時萬曆壬子四月二十日也距生嘉靖癸丑六月十有三日年正六十配洪孺人三塘應禎女生伯子惟時及二女副室姑蘇徐氏女生少子惟昭時娶靈山方雲鵬女昭聘洪源洪思偉女孫男二起祚聘郡城儒士畢士燿女周祚未聘女適鄭村文學鄭某子國儋西沙溪汪惟誠孫女二一適長源儒官程九鳴子嗣基一未字其初自唐御史少微以來諸聞人具伯子狀不具論太史公言范蠡擇人而任時十九年之中三致千金再分散與貧交疏昆弟此所謂富好行其德者也吳公賈夏鎮與適齊之陶壤

相近能以富行德奚啻十九年千金其爲光祿輒自免庶幾鴟夷子皮之自全矣伯子因余所知程生子沂以志銘請余讀其狀文而不誣爲之銘曰藐哉孤集蓼荼心瞿瞿容若愚知過軀賈爲徒儒爲摹計靡麤閑靡踰衆說郭破攣拘踞津途握筦樞法陶朱貨川輸兄弟俱唱于喁培根株枝相扶戚葭葶粲不殊三戶區萬井都寒者襦餒者舖藁者蘇悲者愉義問孚漢八廚荷天衢奉帝壺賸賓觚載宴娛日行脯歸來乎飽尊鱸泛五湖美丈夫千里駒九苞雛纘令圖福德符表三吳原膺膺爾斯瑜銘碩膚辭匪諛神留俞殿黃墟名實專永無渝

光祿署丞程公墓志銘

洪範九五福一曰壽二曰富此二者天所最重不僭賞者也而兼之爲尤難若光祿程公得天之奉多矣公名爵字國光父梅軒公某因自署少軒以識思其先出梁忠壯公至巖將杭公遷臨溪後春公遷黃泥七公遷榆林駢組流離者數十世梅軒公居家富逸爲閭里雄假人不德不責吳越間從之如歸市娶朱孺人有閭儀生公洞睛矐眇父喜吾聞東方朔目如懸珠兒殆類之矣稍長明惠若夙成者受業吳興南陽楊先生所每有難卧或辨以解先生竒其穎發里人陽湖孫公某爲女簡

對見公曰此快婿也以女歸公公方欲以舉子業成名而念父行賈四方且老爲子孫計耳子顧晏然受之乎悉取孫孺人奩具息之其法用白圭薄飲食節衣服與周事僮僕同苦樂廢居居邑候時轉物贏得過當愈于織嗇矣久之輜重竟道大舸蔽江貫貸子錢以巨萬計一邑無與偶者揆事決策見末而知本覩指而知歸然寬緩不苛言語嘔嘔時集同人各陳便宜斷之心胸參之有識故臨事雖米鹽凌雜不勃亂恥談人過有造作端木妄生首尾者振衣去之不欲聞摧剛爲柔含垢忍辱若曳裴遐墜地還坐舉止如常舉標擲王夷甫面都

無言也許文穆公嘉其疏率因與締婚梅軒公任俠置酒高會及優侏儒優雜子女族舉遞奏公侍坐終日了若無覩父爲之小減然猶不廢聲伎語公卿自用卿法我自用法耳諸子旣長且有官秩具威儀或披阿錫紵縞持梁刺齒肥出則擁大蓋策駟馬取婦多貴家女靚粧刻飭芬香溫鬱公弗善也益務爲節約以身教之麥飯豆粥單席緼袍監門之養不敵于此所餽遺人不過算器食譙訶諸子苦言至戒手携耳提大要以生財有時用力有倦而好玩無窮以有時與有倦養無窮而度量不生其間是以漏卮盛水也雖萬乘之主不堪而

況匹夫編戶之民乎若曹鞅荒肆之樂詘流漫之志廢淫康之虞庶其有繼無以乃公田舍翁不能爲若所爲再實之木懼其根必傷耳不聽吾言遷思回慮者非吾子也諸子損去踰侈長飾而後敢見居恒言貴賤有等相事相使無取慢也吾處布衣之位焉得以素封封已養高公卿大夫舉足左右便有輕重吾雖不能至然心鄉往之禮一命不齒於鄉層累而上可知已里有貴人望禁光侍謁於前幸而臨之擁篲迎門却行虛上舍而館之親修具肴鞫脰奉觴上壽恣所欲以順適其意客卽貴倨見公數執謙退降等相接也公沾沾自喜見

斯衆賢足以忘疾釋愁可罷遣常客矣其事父下氣怡聲病則顛天以身代朝暮瞻察未嘗一日蓐寢父以大耄終哀猶孺子母早世如母者三人所舉子亦三父卒叔季髮財覆額或言公造家功多不宜與諸弟均產公不可吾無以埤益弟而顧割之自肥耶諸弟蓄積餘業殷殷起矣族無宗祠請于父首事祠巍然甲里中歲大侵骨肉出逐不收挑藜藿入窮閭飼其餒者故舊共更艱厄爲卹護其妻子有善人在患饑不及餐之義焉傾廩二千石以賑吳興貧弱萌隸諸臺使以聞樹棹楔旌門而郡大夫爲之評曰義洽千里澤被三吳云其他若

繕黃坑寺新諸祠廟造舟爲梁伐石爲橋費夥而施普矣晚以例爲光祿丞服其服拜賜不復御李明府禮致之賓于鄉祭酒固辭不得強起赴之自是杜門簡出會年七十語諸子吾昔者以代若太父服勞徼天幸歲入什伯于往捲握之物足支十世今吾老而傳之日也若曹儒者儒賈者賈其善自爲計藝由已立名自人成吾但含飴弄孫不復闕家政矣而繼母朱無恙共子職唯謹病彌留無所言搏顙床頭呼其母曰命先犬馬不得終事母抱恨入冥神耶當復相見者從此辭矣其歲爲萬曆辛亥三月二日距生嘉靖己亥五月三日年七十

有三元配孫孺人繼汪孺人再繼黃孺人副之者陳與
江今惟江在子七人孫出者夢禎中書舍人直文華殿
初聘文穆許公國女繼娶督府李公錫女夢鯉鴻臚寺
序班娶廷尉丞黃公應坤女禎鯉俱先公卒陳出者夢
賜中書舍人直文華殿娶太學生吳公繼康女汪出者
夢熊中書舍人直文華殿娶中丞吳公中明女繼孫公
天馭女江出者夢龍娶奉常吳公應明女黃出者夢蛟
初聘民部胡公玠女繼侍御史汪公先岸女夢周聘督
學使洪公翼聖女女二文學吳守約太學吳公守周子
可當其婿也孫男子八人明宗明佐明翼明儒明卿明

奎俱夢賜出明輔夢熊出明瑞夢龍出宗娶比部方公
道通女佐聘民部張公泰階女爲夢鯉後翼聘叅知政
事金公忠士子太學呈耀女儒聘太學吳公懷讓女輔
聘侍御汪公有功女爲夢禎後卿聘廷尉丞洪公文衡
子太學嗣成女瑞聘儀部鮑公應鰲子太學玄度女奎
聘太學吳公公治女孫女十一人賜出者一適內史吳
公養春子繼序一適文學汪公時英子太學公毅一字
文學朱公文時子某一字侍御畢公懋康子某熊出者
一字汪公羔子某一字洪太學公嗣成子某卽前廷尉
公孫一字進士吳公之俊子某龍出者字太學吳公懷

讓子其餘未字曾孫女一明宗出未字以甲寅十有一月二十有四日葬江坑之陽余與公婚姻汪民部侍御兄弟善悉公家世生平而季子應熊以兩汪公意屬余志蓋公童牙自立鵠髮不衰箕疇所謂康寧攸好德考終命者胥有之而子孫逢吉家用平康又備諸休徵等千戶侯有浩大之福殆非偶矣銘曰多富多壽多男三祝備焉胡爲乎其然曰慈曰儉曰不敢先被褐懷玉不欲見賢窪則盈枉則全天道因人人善承天吾爲之銘以詔爾子孫勉旃

典客吳公墓志銘

吳氏兄弟九人余得見者三兄弟之子數十人得見者十許人皆相好無相尤和氣致祥宜子孫之多且賢也典客于兄弟行居五叅軍居七叅軍捧檄出使其子以武進士爲粵西都護過家上冢奉典客游致足樂也無何典客卒叅軍哭之極哀手狀其行事如泣如訴有餘悲焉屬伯兄之子公勵連然流涕以墓志請余稔知吳氏義門典客夾輔功居多典客父內史公元配程孺人舉六子皆長副室舉三子皆幼典客有知慧受書多通作字臨模蘭亭而易直子諒父兄稱之曰此吾家第五也內史公謝事歸伯子卒其六人者或待詔公車或肄

業成均或鼓篋鄉學或歸依淨土其二尚孩提門內外
事悉倚辦典客綜理愜兩人志已父母卒事益叢服益
勤而業益振祝昔有加典客居喪爲孺子慕歲時若忌
日齋戒祭祀如臨父母焉事庶母盡禮而念三弟少孤
憂喜相關有無相通終其身如一日食指繁析箸則以
先世所遺同心堂讓諸兄而自構別第居之貲亦十千
萬二兄之終也以二孤託爲之部署生產授經勸學胥
成令器四兄宦豫章攝其家政比以德慶州牧還里日
交手事之食息起居相隨歿而有孳子稚孫又異母調
護輯睦中外謚如之維揚而八弟病革所爲經理甚備

諸子學者賈者因材授任駸駸興起二兄故禪誦所四
兄故道南社有其舉之莫或廢也祖奕五公文肅公有
祠有理學名儒坊繕治圯敝外父邵公有子無孫問何
欲置爲子同產子所子客維揚乳哺之稍長則令與諸
子同塾年踰四十而後有子不以晚得姑息生平馴行
孝謹計有一二難悖聽無失本末難惑也見人不善法
語相規或就車而去終已不顧事已轉而與之處以國
子生除典客不就職人以其修正推爲祭酒鄉鄰有鬪
陳其勢言其方衆徧隨而服家雖溫不恥惡衣惡食不
吝出納赴義不辭勞怨周人困厄不責報邑大夫知其

長者數相咨決絕不請謁事情鄉射以賓僎請固辭不
往體素伉健不稱疾忽疾不可爲猶念諸兄弟子姓生
計薄贈叅軍與八九弟各千金諸臨候者問所痛苦曰
痛誠有之殊無所苦斯亦達于生死之故矣卒之日諸
弟諸子三黨四隣哭于其位皆失聲典客名繼鳴字鳴
謙生嘉靖辛亥二月十日歿萬曆甲寅十有一月九日
年六十有四元配浙江副使邵公某女爲置宜子者舉
子六人長明家娶率口提舉程元正女次明寓娶方干
太學程廷溥女伯仲俱太學生三明寅娶隆阜戴啓賢
女四明宸聘隆阜太學戴大園女五明守聘草市孫元

亨女六明察聘竹林太學汪高科女女八人長壻程學
義浯溪棊子次壻孫體乾草市學賢子三壻汪時來竹
林沔子四壻嘉興諸生黃元龍灣光祿丞道明子五壻
太學程家龍富溪太學宗涵子六壻程廷起蟾溪別駕
尚賢子七壻程義芳鍾澤光祿正士晉子八壻張某漁
洲太學洲子孫男一承震出孫女二一震出一寓出俱
幼未字其上世代有聞人詳狀中銘曰維齊王昕魏崔
樞兄弟九人猶龍乎地靈今者在天都九龍受姓自句
吳中有典客君子儒兄兄弟弟最友于有酒無酒滑且
酤如鼓瑟琴良宴娛死喪孔懷脊令呼卯而翼之六尺

孤鳶蘿松栢勢相扶棠棣之華鄂與柎天胙爾德命不
渝宜爾室家樂妻孥六馬孔良六轡濡奕世令儀曰華
腴銘者名也蟲蟲跌以詔後昆是究圖

周府教授劉公墓志銘

余童子時爲諸生及見先大夫同時游鄉校士二三長
者皆有先進風比仕宦歸宿素衰落獨漢川劉漢壁先
生真長者也先生名烜字用晦父曰宗訓母張碩人而
其族富人大本者見先生有異資取以畀其偶蕭孺人
可爲若子是時先生七歲耳先是大本以外家張氏子
爲子名之曰燧視先生十歲以長嗣父母督教嚴燧舉

于鄉仕至郎中先生亦爲邑諸生高等食廩餼郎中公
名理學斤斤不踰尺寸先生亦沉靜不苟言笑蕭孺人
恒言是兒功名未可知必不失爲君子蕭孺人卒繼室
王孺人生二子曰輝曰炳其行事不如二兄先生時奉
父母之訓譬曉之遂爲鄉里所安嗣父居縣東百里周
陂築堤捍水歲收萬石而自荊州沙洋堤成周陂受水
蕩然一壑劉氏生計日感先生卜居阜角市授徒不責
月奉先大夫雅重先生歲時伏臘資之筆札薪水余兄
弟嚴重先生而先生降心相從引與爲友每言及先大
夫潛然隕涕居平恥談人短遭少年羣不逞于途卽引

避之巖墻險道必不敢置足聲色貨利若將浼焉其性
然也久次當貢有吳生者篤老次在先生後讓之學使
金公嘉其誼下檄旌門吳生以所得續食金餽先生先
生固辭明年上春官吳客死京師餘一空囊耳告同鄉
薦紳爲治棺殮輿以歸葬已除黃岡訓導黃岡士數折
節延攬解衣推食其貧者士歸之如市而郎中公訪耿
恭簡于黃安先生從之執贄受業當事者察先生饒吏
事諸按比戶口振廩救荒稽覈帑藏咸屬之不縱不苛
而會有劉汝國之亂徵發如雨捐其秩祿爲簿書之費
橐洗矣擢教諭大冶黃岡士人立碑志去思焉教大冶

如黃岡已擢河南開封教授漢陽蕭次公爲督學有葭
莩戚或丐爲居間先生拒之至稱疾不出而巧宦者嘲
其迂左遷王門無何示疾先一日邀客行酒語其子人
孰無死惟得善地以厝得名筆以志庶幾不朽孝子慈
孫所宜知也意蓋屬余云自王子侯以下衣冠弔誅者
千百人靈輻旣駕門弟子相向而哭失聲又十四年而
子皐永始得地梅城之陽以葬附母宋孺人奉先生治
命不遠千里來請志因述其母爲京山宋國經女先生
不治生產御子寬而孺人用嚴小過必笞曰無令以不
肖爲父母辱少年言動不循理戒諸子無與交先生元

配蘇孺人有女爲儒士陳天棟婦孺人女之如巳女所
乳子三人長泰永武生娶諸生胡滿孫女次華永儒士
娶諸生陳倣女少子卽臯永邑諸生娶教諭李如瓊女
孫四人正法臯出也行法約法華出也守法泰出也泰
有女一先生生嘉靖庚寅六月四日卒萬曆辛丑正月
十有九日年七十有二宋孺人生嘉靖丙午十有一月
十有八日卒萬曆甲辰五月二十有三日年五十有九
余因先生思先大夫所敬愛於心戚戚焉又嘉其子服
膺父訓久而不忘也卽人與言不足爲先生重何可他
委竊窺先生道術類柱下史采其語而銘之曰吾不知

誰氏之子象帝之先居善地心善淵猶兮若畏四隣豫
兮若冬涉川功成事遂百姓皆曰我自然執古之道以
御今之有吾將以爲教父旣知其子旣得其母不失其
所者久死而不亡者壽

目公而奇之以女女公是爲熊淑人於時舉子業不得施用去而爲詩往往作北地信陽語而會聞鄒文莊講新建之學負笈裹糧走青原奉贄稱門弟子文莊弟子自縉紳韋布後先可千百計其以王子侯著錄者公一人耳所友善則羅文恭文恭爲輿地圖多就公取財而繕寫劖劖出公貲過半旣師友海內大儒意知日益務爲束脩至行攝纓整襟規矩其步時布衣蔬食與齊民伍熊淑人椎結弋綈治生作勞交相贊也輔國公蒞子姓莊公與淑人朝暮上食單極滋味食甘爲之色喜不則懼然自刻卽淑人亦懷怪大人無乃有不足君所耶

輔國公退而省其私憐之望見公來輒霽威嚴侍父病浹旬不問枕席因受醫方嘗藥而進之復初然後卽安比卒哭無常而貌省瘦居恒念熊太夫人蚤世時祭必敬雖小物不祭不敢嘗事繼母蕭益虔其卒也持三年服故事宗人喪其元配而子壯者聽再內婦名內助不得稱繼室公不可禮以義起吾繇吾父及之耳宗人高其誼亦爲服母王舉仲多臯及公年且老未有爵秩公請於朝主者奉宗正條從事咸中格或以費詘罷積數年公竟得從子爵封母爲淑人其心力俱瘁矣王淑人翟服魚軒遨遊兩家顧獨安公與熊淑人極歡累日月

而更伯兄中美熊太夫人出也事之白首不懈仲蚤產子夭爲禱於名山數舉子所以調護甚厚嘗買田安義歲入三百石有奇侵牟者交構其間慨然讓之歲甲子公年三十邁奇疾十日不知人仲請以身代熊淑人亦剪爪徒跣籲天告哀諸兄弟視藥羣從量水疎屬搏頰而啼婚姻知交謁候禳禱相踵疾乃瘳家無贏羨專趣人之急甚已之私至稱貸濟之所善客客他邸老不能歸月授廩終其身病獨身自隱親經給醫藥又爲之殯客吳人賈而折閱操傳別丐公廐馬或謂是必相負不宜予公曰吾寧望報乎熊淑人能佐公爲德諸姑姊姒

共其困乏出入無券博士公老無子輦之來就養沒則懸象寢門之外祀之詔諸子吾不忍吾翁鬼餒也熊淑人爲公乳丈夫子五人少卽謹擇良師誨之去舍傍數十武構精廬日再三程督不以寒暑輟淑人執女紅黻脂火達丙夜刀尺無聲而諸子始歸就寢也以故諸子文行並有父風公於文取達意而不諧俗於行取爲已而不近名楚何司寇開府江右三年雅慕公數使存之不爲報去之日遣信展謝及於匡廬司寇嘉嘆恨失公其後郡二千石羣鄉士大夫講業有強公往者謝不應學在我不在二千石也自六籍外旁通陰陽醫卜術數

尤善形家言熊淑人卒卜兆南昌長定鄉之烏龍岡而
以喪禮尚右厝淑人左虛其右以踐同穴之信末年讀
二氏書相說以解遂杜門謝客非吊死問喪不復出久
之盡以家政傳子而招延二三物外友談究名理或弄
諸孫膝下稱說先世事時或不冠幘隱几假寐曳杖行
歌而已矣豫章諸王孫嫺詞賦多技能爲方內冠而以
噉名心競力爭遂爲怨府得公一洗之余嘗造中美衣
冠有古風左右匿笑不已此夫解衣盤礴羸真畫者也
然中美猶爲余所知余三如豫章而不知有公公固不
易知知公亦何容易哉公卒中美迺與謀時兄弟走使

千里而乞余銘墓中之石又以其里人徐司空言申之
公誠不徼身後名何可令世不知朱邸中有長者其人
耶因采張比部所爲公狀萬司馬所爲熊淑人銘與謀
時兄弟所錄公淑人行略誌而銘之余又聞輔國當濠
庶人時佯病自匿不染於辭鎮國不難割恒產以葬其
弟之母至卯翼兩弟功甚大世德作求此之謂矣公卒
萬曆癸巳八月十有五日距生嘉靖乙未六月六日春
秋五十有九葬以丙申二月十日熊淑人卒萬曆乙亥
四月十有三日距生嘉靖乙未二月二十有二日春秋
四十有一葬以其年某月某日子謀謹蚤卒無後其封

鎮國中尉者一曰謀時婦鄭二曰謀主婦張三曰謀坐
婦吳四曰謀哇婦吳五曰謀謹婦閔俱恭人獨鄭卒繼
以內助諶庶生者男子二人女子三人孫男女俱十一
人謀時出者統鑄統錡統錡女字李暹彭夢龍謀主出
者統鑄統錡統某謀坐出者統銷統釵女字楊利民謀
哇出者統鑄統某女字萬思昊餘未請名未字銘曰豫
章輪困離奇衰然玉葉金枝胡不本根是庇日尋斧斤
以斯名者衆所欲之紛紛攘臂離跂連雞固難並時參
辰商晉相夷有美一人冒彫其腹便便若瓶專氣致柔
嬰兒天門開闔無雌多能亦何常師若一个斷斷猗衆

皆冕而衣裨緇布之冠不蕤嗟彼附羶蟻馳衡門可以
棲遲何用合驩曰眴豈伊夸毗喔咿大圭不琢不追大
器何覆何敬刑于寡妻克諧教誨爾子媿媿相土堇荼
如飴坎而封之馬鬣神于歲兮宴娛

都察院右僉都御史張公王恭人墓志銘

歲辛卯余承乏大梁助甫先生徵會南頓信宿而別明
年余以梁事中白簡竄歸向後凡九年財一通問先生
卒不及聞又三年會長公後之都門具道治命以墓中
石屬余志且云當以狀來又四年元配王恭人卒先生
入室弟子閻汝用狀先生及恭人而後之兄弟使使走

大必山房集 卷之九十二 墓銘 五 高
鄜衍申前請憶余從先生官長安二十六年往矣文酒
酬酢宛然在目幸而後歿志先生者責實在余按狀先
生上世蘇州府嘉定縣人高王父得貴賈蔡以籍自占
三傳至封公莘配戴安人是生先生先生之生也安人
感異夢以爲祥比免乳穎悟絕倫應奉五行俱下禰衡
一覽輒記殆兼之矣八歲爲博士業已爲古文辭博雅
雄麗老師宿儒不通曉也十四補邑諸生餘姚翁司馬
爲督學使都試諸生以先生爲冠封公次之司馬嘆曰
父不得而子信乎他日以文名世吾不及也赴省試五
策幾二萬餘言主司大賞嘆舉第二人明年成進士時

甫勝冠耳除知黃梅縣縣舟車縮轂南荆跋扈東陵巨
猾盤據市井中有司莫敢問先生廉得其主名禽治之
卽窮里民以事入謁悉知其家人生口作業發姦摘伏
如神邑大驚相戒毋敢犯令事至首尾衡決不移時而
畢庭虛無人閉戶讀書賦詩有四方之客相與游覽邑
外佳山水蠟屐胡床觴詠竟日人以爲潘河陽路浚儀
之儔也三年擢吏部郎自主事以至郎中凡十任而是
時諸曹郎王元美李于鱗徐子與宗子相梁公實吳明
卿結社談藝文必先秦兩漢詩必漢魏六朝唐大曆以
上傲倪一世人莫測其所以目之爲狂先生心好之比

入都則諸子去國獨子相同舍相得甚歡無厭而先生所最服慕者惟王先生子相因以書通先生於王先生所兩人莫逆於心不必撫塵而遊矣會王先生父司馬公失分宜相歡構下詔獄王先生棄官來視橐餽分宜父子故憾王先生與諸郎杯酒間多譏刺語使人躡尋蹤跡門徒故吏皆恐鳥獸散先生以從王先生遊晚日夕招尋時而歌時而泣而更羸服存司馬犴狴中王先生辭無乃爲君累乎先生艷然曰士爲知己死死且不避官於何有分宜好言詩先生同舍郎分宜鄉人以其詩與先生詩並進分宜亟稱張郎詩大佳非爾所及也

一日俱詣分宜分宜顧問先生新詩幾許同舍郎從旁遽對昨與王某詩郎不如也請爲相君誦之分宜色赤而徐魏國欲封其愛妾行千金分宜父子所冀必得之先生爲司封郎持不可分宜志是區區者而不余畀乎先生自念次當爲考功文選事與政府相牴牾益多請就散秩分宜陽諾遷南尚寶卿未至以風霾計吏修前憾補外外當得僉憲而同舍郎阿邑分宜謫爲廣平郡丞先生才名藉甚又遷客衆心畏其難近顧退然自下安繁戀劇無異爲黃梅時淦水溢城且潰單騎出拯溺者水行及肩不去所全活無算稍遷湖廣按察司僉事

治巴陵登岳陽樓舉酒酌范希文先憂後樂者蓋憂讒
畏譏之甚姑自寬耳我則異於是素位而行皆樂事也
夫何憂巴陵至武昌風帆一昔可至嘗乘月放舟俄雲
起蔽天迅雷風烈江波鼎沸舟人面如灰土先生莞爾
而笑吾往者知滄水之能溺人而犯之卒無患今何犯
於江水而葬江魚之腹哉頃之舟忽抵岸猿引而上才
容數十人且泣且歡呼微公福德寧渠及此施州夷酋
黃中叛合川湖兩省兵剿之監司爭功罪屢年不決
上命按臣會勘湖廣則屬先生先生開誠布公得其翔
實功罪不相掩議乃定而更區畫方略以善其後迄今

賴之是行也往來巫山西陵間可半歲得詩多而奇評
者謂如少陵之有夔州也已於事而竣稍遷右叅議而
被勘者與前不任勘者復爲蜚語中先生當調先生心
獨喜吾重違家大人之命隨牒遠方今且有辭歸而侍
膝下色養三公安足易乎卜築邑北十里河干爲綠波
樓積書萬卷諷誦其中而母弟見甫乾甫皆善屬文兄
弟間自相師友每文成奏之頃篋之和盈耳而棠棣之
萼不快目封公安人樂之七箸日益加久之二人卒先
生哀而毀跋涉霜雪下婁江丐王先生爲志歸則屏居
非其人不可得見中朝故舊勸駕不答而邑人司空曹

公於先生爲中表兄每過先生揚扇千古及國典朝章
四方利病九邊要害歷歷如指掌司空解頤是才什伯
我非丘壑中物也凡十年起家仍故官分守涼州而有
莊浪軍變莊浪左番右虜其中土漢軍雜處都督魯東
者病子稚不曉事虜款久客兵芻粟腐敗兵使其請給
軍悉本色而歲比豐本色賈太賤軍乞折色不許鼓譟
焚兵使第鉢虜來寇甘肅遠近震恐先生甫入境督府
石恭襄公語人此足辦賊矣檄先生攝莊浪左右無非
賊耳目者先生數過之佯不爲動而少司馬吳公以大
閱來諸從官例各有兵仗呵護密分置賊魁石明等二

十許人兵仗中而命將分禽之賊已誅城中人不知也
先生誅賊假手魯氏魯氏兵復弱其主蠢蠢思亂復以
計除之蓋魯氏恃先生安危矣其年不登軍請乞支本
色月許先生給半歲衆踴躍謳吟而公家朽蠹悉爲實
用等與耳一以召亂一以得士人之才知相越不亦遠
哉論功擢副使備兵江東逾年方代而虜王俺荅提三
十萬衆西牧寄徑甘肅督撫有戒心失先生如失左右
手上書調先生甘州先生言虜王子小吉囊敗於瓦剌
以父兵報怨其曰迎佛虛聲耳勝則氣益驕敗則羞而
成怒我且代瓦剌受禍雖然彼不訟言報瓦剌而藉口

迎佛固無必勝之算矣使使說以瓦刺必不可報狀虜
王老於兵信之不復言報瓦刺則有和土魯番哈密出
嘉峪關之說復使人諭之關以外若爲政關以內我爲
政不得闖入也王計沮則有甘州馬市之說復使人諭
之若市固在宣大宣大市罷則許若甘州王計沮則有
諸番茶市之說復使人諭之茶非若所需番我屬國也
何與若事王計沮則有由內地歸無迂道曠日之說先
生欲無許則示弱欲許恐生得失按地圖而爲之約非
此不移尺寸東則鎮羌西則洪水中則永昌水泉宿重
兵爲犄角緩急相應而間諜李伏保王甲等日伺動靜

誘其左右爲我用期以某日至某所所攜母得過若干
人牛酒外母得他索王唯唯聽命小吉囊不得逞於瓦
刺不欲父東歸王亦以青海善水草未卽發先生知王
所嬖者外生三娘子三娘子與譯使馬應時通禽應時
而俾以王東歸爲贖於是三娘子泣涕從史王東歸而
王所迎佛鎖南堅亦召入甘州餌令與三娘子合謀三
娘子騎而前呼曰余馬首是瞻王遂東是役也虜三十
萬牧青海二年秋毫無犯先生拮据頭鬚爲白督府以
下垂拱蒙成廷臣兩推福建鄖陽巡撫而江陵門人某
子甲於先生後先同舍郎先生相與疎濶某子甲恨之

大泌山房集 卷之九十二 墓銘 高
僅擢右叅政分巡關內關內簿領山積不一月而迎刃
解擢按察使備兵密雲密雲當路塞任者且莫可開府
某子甲不善也移山西總憲事大比士得晉材爲最而
江陵物其黨冰潰朝政一新先生稍遷右方伯仍山西
臺省會舉先生邊材始以右僉都御史巡撫寧夏寧夏
歲荒道殣彌望糴穀二萬五千石賑之又爲開河渠建
橋開修河堰疏堙塞改堤墻以備水旱廣招徠撥墾種
立堡寨專責成以儲軍實繪圖獻之

上報可得新田一十四萬畝有奇斬賀蘭山赤木口虜
不敢窺左足修興武諸城及他營壘數百里有奇虜故
懼先生威名歲來就市奉要東惟謹省費二萬金有奇
上數賜金幣旌勞將有殊尤之擢而先生舉進士三十
餘年同榜無一人在新進不悉本末爭以治江陵黨爲
名高謂先生亦黨人彈事上莫爲相明者坐調外其後
兩御史覈寧夏屯田及他修守功并言先生冤狀
上爲復故官候召用又數年而寧夏有倖賊事合諸路
兵堇而勝之識者扼腕令張先生而在庸至是乎後之
舉於鄉先生慰勞之曰吾寡蟬蟻子之援

上召我田間十年開府數爲讒口所厄
上滿拭之無以報恩孺子勉乎哉明年起撫貴州而拾

餘唾者未已先生慨然曰吾志固久決矣是未爲知我者亦未爲不知我也先生官高而家無厚藏惟藏書數萬卷綠波樓不能時至於居第傍構小齋擁書朗誦倦則焚香趺坐家人或罕接見旣春秋六十喟然而嘆天佚我以老何自苦爲鑿池百畝南門之外號曰南塘修竹垂柳環之亭館可以憇畫舫籃輿可以游魚鳥花柳可以翫偕子弟門人倘佯其間同里則馬雲從閩汝用曹季虎汝陽則秦京越則張以芳又爲社曰大呂執經問難賦詩言志而先生評騭之申陽何令升王思延詩筒月一至焉令升尊人宗伯公汝陽冢宰趙公朗陵罔

卿陳公歲一會春和遊諸名勝樂山賢首杖履畢至五百里內德星載聚矣他冠蓋造門輒謝病不內有以珍翫遺者謹謝之曰吾不省此器用具數不求華整食不重味衣不厭浣補而性好施舅氏貧割田宅資之卒名富人明經楊汝茂邢梯死而暴露爲舉葬而哀楊無子爲文祭之語酸楚刺骨其經紀真陽蔣令喪更備邑嘗大饑盡捐廩粟食之千石以上有司當上聞旌其門先生掩耳無汙我事關通國利害若大冤苦爲白當事者疊疊百千言卒不令人知也元配王恭人父光祿恭緒家有宛財賢其女擇對而與封公善器先生於兒時以

恭人女之封公困諸生不必溫飽而恭人以得偶先生
才士爲幸力佐先生學盡出其裝購異書先生朝莫讀
恭人朝莫績相之脫粟飯菜羹苦茗醴齊充虛解勞而
已而佐先生養親必以甘毳封公異之是才與德男子
不如真吾兒婦也居黃梅操作如居家先生通不受人
餉而同榜瞿君以好李一簋強受之恭人遽麾出豈陳
仲子糟食之餘耶先生與瞿君愧遜不如也先生爲吏
部而恭人稱命婦不改其素居廣平時慰藉先生大丈夫
夫以不負君民爲貴不在官崇卑聞先生拯溺復出其
裝掩骼齒二叔郎俱有婦遞司中饋斗粟尺布必三分

之叔郎以嚴見憚事之如母已佐先生祭葬戚易相得
而因善病踰年甫差念姑鍾情二女歲時存問餽遺不
絕婚嫁所須錐刀之末寘力焉已舉後之而憂終鮮擇
宜子者薦之先生已當夕祝其有身已有身授以胎教
已免乳炊糜絮羹食之已生男訓之幼儀生女訓之內
則薰然慈仁鳴鳩如一也少嘗習女史曉會計人無能
欺臧獲千指任職賦功不肅而成先生男女所以室家
四方賓客所以輻輳婚姻井里所以慶弔施報匡困資
無一切倚辦恭人緩急豐約中度先生沒撫少子良而
啼天平何失父之早也以屬後之良所不如兄者無見

未亡人地下後之敬諾諸姬無子者悉遣嫁蓋不任憂
悒病滋深矣而不欲諸兒依依膝下伯上春官季入南
太學獨仲侍疾革探篋中故衣分諸子婦稍完善者
餉諸姑伯姊作念戚黨以歲侵貸數百金勿收責焚其
券先生生嘉靖癸巳某月某日卒萬曆戊戌某月某日
年六十有六恭人生嘉靖庚寅某月某日卒萬曆甲辰
某月某日年七十有五先生嘗過綠波樓見手所植松
竹成林泣下沾襟樹猶如此人何以堪百歲後蒐而有
知舍此何適矣爲竈藏明器焉而後之兄弟以某年某
月某日啓而歲葬事中丞直指采汝南月旦評上言先

生文行動勞宜有旌卹大宗伯大司馬以爲允覆奏得
旨遣藩臣諭祭學官弟子復祀先生於鄉先生名九一
字助甫身長七尺軒軒如朝霞舉濯濯如春月柳目爛
爛如巖下電飲可五斗而醉二三傀儡如玉山將崩宏
覽博物曾吞雲夢八九善章草書投壺能四十餘驍與
銅梁張肖甫豫章余德甫俱以文名郎署世號三甫初
王先生五子及謝茂秦而六各爲五子詩已黜茂秦進
明卿合之爲七子王先生爲後五子詩自三甫外則蒲
圻魏順甫欵江伯玉王先生母弟敬美不在此限總之
爲七子三甫二王天下尊鄉之先生最少成名最早與

婁江等而虛懷樂善多所登進嶺南黎惟敬方偕計吏以書迎之涿鹿至則兄事之即余無似不惜齒牙餘論獎成也歸田後詩律益細別為南塘稿卒之前一歲下帷距躍讐校忘寢食恭人竊窺之諷曰持此安歸先生為之一粲吾千古在焉非乃所知今都名之綠波樓集復有朔方奏議六卷世固多誦法者不具論第述其生平行業大致云丈夫子三人伯體震戊子舉人後之其字先娶某繼娶某恭人出也仲體咸縣學生先娶某繼娶某季體良太學生娶某女女子子某人某某某某其婿也孫男某人孫女某人咸母陳良母胡陳灤州人

其事類李絡秀而又有孔姬者慧甚恭人憐愛之陳為恭人保抱後之不與小星衾稠者七年俱以疫坊於晉之欲啓柩咸不可母在不敢私侍先中丞沒何得竝女君非母志也先生刑于貽穀茲一端可徵已銘曰明明天子用夏變夷九有廓清若作梓材其塗丹雘待人而行皇矣

世宗鴻藻景鑠迺集大成溫洛榮河圖書所出以開太平崧高極天維神降止育我國楨李何肇迹公也嗣之虎變鳳鳴含咀六藝網羅百氏鼓吹兩京唾為珠璣字

挾風霜紙落烟雲片言袞鉞白骨載肉山岳可傾雕蟲
刻鵠無適於用俗士所輕矯矯張公經文緯武操其奇
羸四方于宣西戎北狄爾實干城在朝鼎彝在野竹帛
不朽長生亦有細君求賢審官無割爾名得全全昌宜
爾子孫難弟難兄汝水垂瓠至於鮦陽新阡是營埋玉
一雙氣如白虹旁燭八紘

應天府尹李公刁宜人墓志銘

京兆李公季子瓚以公卒後某年某月某日奉公元配
刁宜人合葬於某某新阡而以公婚姻兄弟于太僕文
若所爲公狀司理侯中鵠所爲宜人狀屬不佞某志墓

中石憶往歲不佞以浙按察使上計受白簡抨彈鄉人
大理卿鄭公每言余僚李公極爲君不平也不佞深感
公知已然終未及門申私款公今逝矣志何可但已按
狀公諱堯民字畊堯別號雍野山東濟寧州人也先世
有受室鄆城者因家焉萬曆癸酉以易舉其省第六人
明年成進士知長洲縣以父喪歸服除再知永年縣以
母喪歸服除選授江西道御史視河東鹽政巡按蘇松
常鎮以病歸再除浙江道御史視直隸學政復以病歸
三年拜大理寺丞四年遷本寺右少卿四年遷應天府
尹復以病予告二年卒是爲丙午十有二月四日距其

生嘉靖甲辰正月十有四日年六十有三宜人鄆城人
以公貴初封孺人再贈宜人年二十歸公其卒爲萬曆
戊戌某月某日距其生嘉靖癸卯某月某日年五十有
六公會王父曰玘王父曰顯父曰贈大理公勤娶于段
無子助造者劉是生公劉以先失贈公封太孺人贈宜
人段贈孺人再贈宜人刁宜人曾王父曰諫爲考城諭
王父曰臻父曰應魁爲茂才娶于徐是生宜人長公一
歲母初娠夢若神指其腹中非常品善視之寤而生宜
人羣蜂繞身人以爲祥稍長執女紅精良授之唐人詩
成誦父摩挲其頂惜也非男子而公自孩提時日強記

千言屬文語驚人茂才公見而奇之必李氏子爲吾女
對者贈公介媒妁委禽公垂髫爲諸生試數高等廩於
官學益勤獨居一室人莫接其面至咯血不休先時贈
公有督亢田與貴人連畔貴人貪之屬有司困贈公大
役不五年田盡爲貴人有而宜人來歸則家日耗矣公
口不言貧州大夫憐其才體貌加常等然非公事不造
門稍授經里塾取月奉爲養贈公遊於酒人宜人輟簪
珥貫酒無令翁虛願後豪當還也公夜誦宜人以刀尺
纂組侍譙鼓或晨戒發昫甫罷燕媒惰慢不介容儀公
喜吾得婦也上不失養中不廢學宜人亦從叟公出就

賢師友輩作輩學相勸帥母以井曰分念學大成遂成
進士令長洲長洲吳首邑小民苦賦重當孔道供張煩
費桀黠民飛鉗揣摩熒惑視聽俗尚淫巧貴難得之貨
附蔭權勢脫漏算事不可詰問公下車杜請謁謝禮遺
申法禁覈簿領所刑胥史之屬作奸犯科若而人市井
少年譎觚非常若而人強家豪右并兼武斷若而人喪
荒羞服賓客工事莫不有式吳人始駭且疑已畏且服
究乃大安官府若無人亭落若無吏三年更以柔道勝
之或詰公後先異操公曰揉曲木者不月銷金石者不
日人情利害好惡寧木石比三年而變猶以爲晚也勸

學行禮散利薄征城隍畎澮橋梁道路事無不舉而民
不知勞流亡來歸鄰國質成焉時贈公劉宜人居吳公
什九在外宜人具死生龜薨之物辨割烹煎和之事調
食羹醬齊之用正脩刑臙胖骨鱠之名度量衣淳制寒
煖之宜汗澣綻補之節親春枕道簌灑掃井園之務尊
章悅而安之而椎布如寒峻婦已贈公疾相公察聲色
供藥石招禳禳袂日不假寐贈公卒公哭之毀宜人
同之長洲人失公攀援號泣無異公哀其父也再知永
年永年謠俗猶有趙風公治務崇長厚客問何以異長
洲公譬之曰趙雕捍而少慮微重而矜節嚴則愈磯寬

則易爲德吳利而巧文而不慚嚴則庶幾小戢寬則易
我矣道有升降政由俗革豈拘於一曲哉執政下均田
令所在麻沸公身履畝脩任土之法以物地事授地職
露宿田間手足胼胝民不忍欺以實自占夫家六畜之
數墮墮埒疆之形纖毫無忒畿輔稱均田善者無如永
年朝覲會同永年縮轂其口故事牢禮委積膳獻殮牽
陳數靡侈公率從省卽有嫌其菲者不顧而季弟以兄
宦吳遠析箸公憐其貧將迎與同居謀之宜人語合挈
家秉授季無難色劉宜人憐愛少子不欲之永年宜人
長跼固請姑乃偕行無何季卒公恐傷母心莫知計所

出宜人謂公君有官守義無私顧妾請歸而攜季姊與
其子若女來至則子與子齒女與女齒先爲姊之子納
婦爲姊之女相攸而公之子若女後之劉宜人又有少
女装送必豐子若女母得鈞禮段宜人撫公恩勤如實
出已公事之就養無方而爲諸生時蚤沒公慟不欲生
旣用令考績贈封二母宜人與公哭失聲家衆皆泣歲
時伏臘若家有慶事或服食器用非諸生時所有思段
母不及見恒爲鯁涕已而太宜人疾且卒公宜人所爲
治疾持喪一如贈公永年人失公攀援號泣無異公哀
其母也免喪冢宰差次兩京爲令者公稱首徵拜御史

上營壽宮卜筮襲吉某子甲新得幸傲睨公卿間排羣
議而自爲地圖以進公力折其非膽落矣出視河東鹽
政所隸秦晉中州踔遠乾沒多方爲計便宜四事曰導
灘水以滋生結曰掣鹽料以利商民曰別私販以通官
鹽曰修墻堰以圖永利迄今著爲令發寧夏池鹽匿稅
六萬有竒運使王以纁者強直自遂上官嗾之予下考
公䟽薦于朝是夫有苦節而無甘言有剛腸而無柔指
識者謂非王公不能受知公非公不能知王公也已按
吳值歲旱太湖水爲涸

上遣給事中往賑給事中者不欲言其名見吳紛華而

悅之過所疲於奔命公喟然嘆曰年穀不登人君減膳
徹縣何論吾輩宴好取成禮而已緩刑弛力舍禁去幾
寬疾安富移民通財發倉廩行糜粥掩骼索鬼神日
孳孳匪懈隱民望公來趨迎羅拜車枳不得發于是有
改折漕糧之請言吳大傀異災民死徙狀殆不堪讀吳
人方執政諸大家有田者諱言旱不可責租入數語執
政旱誠有之何至如直指言䟽格不行公䟽三上爭之
強必可乃已以數百萬漕粟活數百萬衆旋定安輯者
數萬戶明年復旱步禱于神請損已年以生一方民兩
應時澍歲乃大熟吳民棄田業商諸有司市商貨直十

不得一倣漢月平平物價公私畫一樹石五達之衢而
懲其不奉約者貨賄阜通矣貴游子弟浮食竒民山人
俠客聞公風裁不寒而栗基年將代吳萬人詣闕請留
上可其奏而公以作勞病矣求代益懇吳民亦重苦公
泣而別者五百里相屬已醵金貌而祀之三年卽家除
故官佐內察以公平著聲而寧夏討叛功議封侯之賞
公訟言賞宜從厚封則太濫衆遂定兩宮災䟽脩省六
事爲親郊廟宥言官停籍沒惜生命慎好尚發章奏犯
上所深忌而郭御史論宋經畧及蘭谿相被譴公明郭
無罪罪在經畧䟽不報已督學北畿貴人請託實繁公

榜門不受書謁來則焚之每臨校士嚴譏防干擷士毋
敢私語力學者得自見舉南宮若京兆咸公高弟弟子
而長蘆運司設學之說起公持之此爲無名籍無行誼
者逋逃藪耳竟從公言幾士出入不物以屬游飲于市
鬪囂于家譏亂于鄉持人短長者所適及所齎操咸有
籍記巡問而觀察之以時書其德行謹擇其能可任者
褒勞之已取成弘以來先進程式之文爲明文選導使
諷誦之畿輔文體士習翕然反正而島寇會死東師罷
頗張大其伐將告廟宣捷公極言諸臣欺誤罪侷不至
敗不宜矜詡貽後日詬病

上艷然抵諸凡人爲公危懼浹辰小挺公北鄉稽首
上神聖不誅臣愚戇顧臣安能與諾諾者伍謝病歸居
頃之伯子卒仲子復卒宜人不能勝哀寢疾五月而劇與
公訣曰妾幸事君子稱命婦年踰五十夫復何憾獨以
兒女婚嫁累君柰何取生平所服御盡以貽六戚作念
乃瞑公哭之哀吾昔食貧而以妻忘貧吾仕不爲貧而
以妻不欲忘貧吾事親而妻代吾爲子訓子而妻代吾
爲父服官而妻代吾爲臣齊家而妻代吾爲主其事確
其義正其情詞酸楚以故公無仕宦意越三年卽家拜
大理丞不赴故人遺書公

上不用君言故去今用矣得非言有當

上心者乎何忍負之翻然就列後先八年諸獄以邦典
定之邦法斷之邦成弊之聽以五聲麗以八辟訊以三
刺原以三宥三赦刑不虧體罰不虧財所平反不可勝
計其最爲楚宗之譟假王妖書之撼國本也酌衆論存
大體遏亂萌定人心論功甚偉廷推開府及九列長章
十六上不報或諷公不聞霖雨自天亦待雲興四嶽乎
公笑曰是欲我媚竈耳吾骨體不媚如其媚者奚俟今
日吾貳廷尉官不薄卽由此而上七尺何加焉借宦於
朝假譽於左右辱人賤行吾不爲也偶膺霜露之疾疏

乞罷未上而推南京兆得旨朝衆謹李公不宜置之南
公獨欣然吾繇此歸骨故里勝九遷矣歸則申前疏
上許之越二年卒里豪張氏子嘗誣訟季弟窘辱之公
往抹逢彼之怒詢而唾裂冠裳公貴張與前所蝕公父
田者兩豪日夕虞報怨公使人諭之若昔遇我不善人
不病我而病若我復以怨報人謂我何韓魏公知人欺
已終不道破我書此座右猶以道破慚魏公况報耶市
贈公田宅者復市公公辭大人有迫而市罪在迫者孰
迫若而以市我是重我不德也有田鄰公以書致來公
愀然若不幸而鄰我乃至棄其恒產乎其人曰力必不

保此知公不負直是以相歸強而後可鄰不戒於火延
公北樓恐而自列公勞之若欲燬我室而先自燬乎兩
人數適相值耳嘗讀范文正義田記心好之苦力不足
旣自吳歸宜人請曰范文正吳人也君所觀感深矣西
臺月奉可以行君志爲市三百畝義田倣范家法以周
族不能昏葬者爲義塾教族不能學者爲義冢厝里之
不能殯者其他棄責折券施先無告宜人行于家公行
于吳一也貧賤之交久而不忘故人客死經紀其喪子
過鄆則資斧竭矣復厚賻之而自奉殊菲兩宦吳宜人
橐中不載吳一縷公可知已鄉人置酒山肴野蔌盡歡

而罷食前方丈若奏劇則麾之家款客宜人必盛饌雖
倉卒不草具門生故吏餽問一無所受戚黨丐爲關說
者卻之吾不欲人以此加我而我以加人乎郡邑因革
大故民生休戚不憚疊疊陳說也御家人嚴小過予杖
與里人爭卽直在家人杖家人里人若不聞有家人者
而宜人瞻卹饑寒疹疾以恩劑之居恒言不過物動不
過則于詩文類無能者問理翰墨詩則彭澤工部供奉
文則先秦兩京書則右軍大令章草構小樓顏之曰快
獨藏書萬卷人迹罕至比季子啓視之丹鉛手澤殆徧
其學優而仕仕優而學不求人知類此男子三人女子

二人俱宜人出男曰元淳元雅俱鄆諸生元瓚國子生
公教之以正終日立母敢跛倚儼然朝典公出宜人督
課視公而大較勤儉爲本三子皆成令器堂上觀乎室
堂下觀乎上厥有自哉伯文爲教諭梁宗孔子奉祀如
京婦仲女爲太醫院吏目楊經子國光婦元淳婦魏爲
諸生大有女元雅婦樊爲吏目士俊女元瓚婦于爲太
僕少卿若瀛女太僕齊魯聞人卽狀公者也淳雅先公
卒惟瓚在以方太僕不忝冰玉矣淳男一曰光震聘進
士侯提封女瓚男一曰光復聘行人陳伯友女女一字
太子少保樊繼祖玄孫世純公以書生試吏以北產宦

南方又得劇縣一旦犁然職辦吳人相繼當國十年且甚德公公卒不可親疎

上末年詔獄往往寃結其聽于棘木者賴公無頗之人也博學而孱守之微言而篤行之脩于身刑于妻子睦于族洽于鄉黨鄰里正色于朝信于賢士大夫謳吟于民可銘也已銘曰河濟之間大野潏然宰如一丘名京兆阡是生而爲良令爲真御史爲廷尉民無寃沒而桐鄉畏壘蒸嘗尸祝比德前賢其偶相之家人有嚴君焉宜爾子孫不忘不愆

應天府丞孫公張宜人墓誌銘

代

肅皇帝好黃老家言方士雜進禱祠無虛日中貴人櫛掾其間爲囊橐所費大官供億鉅萬無敢誰何者奄杜欽闡出大官物光祿少卿馬公崇謙捕得之以聞欽恐詭言所出物皆以共禱祠少卿執不與又時時非毀上禱祠不當大不敬

上怒杖少卿廷歿之諸奄益衡甚無忌矣是時余同年友太原孫公爲給事中疏言欽盜公家錢無筭幸爲主者所得乃更造飛語罔上陷人大辟欽當誅少卿無罪上斥欽而嘆公言不早出爲陝西宜君尉天下莫不誦肅皇帝之善從諫而嘉公能進忠也心儀公旦晚且鼎

貴用事而公稍遷爲寧國推官刑部主事已調光祿寺
丞遷尚寶少卿爲少卿三年始遷應天府丞爲府丞二
年卒罷罷二十餘年沒矣惜哉公始爲襄陽推官襄故
荆輔郡也余往來道襄襄人誦公事甚著大都發奸摘
伏人莫能欺至其原輕繫亭疑法考竟情實又不忍爲
深文傳致也公七歲時父嘗有太原逮卽侍父獄中父
病且死泣而奉饋鬻進湯藥衣不解帶目不交睫者數
十旬獄中人憐愛之久之夢一人衣冠甚偉執其手語
曰孺子無太苦令而父東向坐飲春根水一盃差矣試
其言病良已而獄終不可解則走告中丞黃鍾所黃爲

人驚悍衆莫敢仰視公旣用孺子往無怖又應對便給
黃前席而聽改容而體貌之父由此得釋里人張曰祥
聞而嘆曰孫氏有子矣雖在縲紲之中可妻也以其女
妻之是爲張宜人宜人旣歸公則操女紅黹脂火夜作
以勸公學少倦勤輒斂衽而前曰君不記獄中時所欲
發憤爲大人雪耻者乎公學愈益勤而文日益有名卒
成進士封其父爲尚寶少卿母錢爲宜人公事二親孝
宜人相之甘旨無缺乏公弟諸弟田宅悉予其美好者
而宜人更從史公爲之室爲之入粟拜爵以此孫氏諸
郎樂公之德而稱宜人之賢不衰也宜人初從公如京

公之襄宜人病公請急歸歸之明日宜人卒公爲虛梁
苟以報之至于今余備位

肅皇帝朝諸言事者非刑則竄公以不貲之軀犯雷霆
不測之怒黜而復起位至京兆猶得優游泉石

肅皇帝大有造於公也可不謂遇乎公名允中字伯時
父名憲憲父景景父銘銘高王父禮故嘗佐

高皇帝爲武畧將軍者也以高郵徙太原太原之有孫
氏自禮始公有二子長謨太原衛指揮僉事次訓翰林
庶吉士女三舉人姚孟吉博士弟子郭登高李之陽其
壻也公卒以萬曆癸酉正月十有三日生以正德丙寅

十有一月十有六日宜人先公六月十有四日生卒以
嘉靖丁未十有一月三十日宜人葬以某年月日公葬
以某年月日墓在某所銘曰誰探驪龍之頷珠兮鼓怒
濤于重淵旣知逆麟之不可嬰兮胡爲乎則然粵婉孌
之韶齡兮奉厥考以周旋雖惠文之峩峩兮扶服奮而
直前矧委質而事君兮寧腆忍而無言惟孝子乃爲忠
臣兮死生得喪夫何遷紛旣有此姁節兮身雖沒而名
傳相隆隆之高丘兮松楸鬱其芊眠疇同穴而嬉游兮
有邦之媛在焉嗚呼千秋百歲兮斯其爲京兆之阡

陝西右布政使祁公金太夫人墓誌銘

高
二七
祁益帝堯之苗裔在晉益顯名已徙大梁在宋爲望族
從南渡徙今山陰福嚴村再徙梅福里自茂興公始也
茂興子安是爲耕樂公設策禦倭以俠聞子紀是爲雲
林公以經術訓家紀子福是爲直菴公以明經仕至蜀
教授門下士爲儒碩名臣者四十許人福仲子司員是
爲梅川公以進士爲侍御史兩出守志鄉賢名宦配食
學宮司員子錦是爲閭齋公贈按察副使娶于沈封太
恭人皆以伯子蒙泉公故蒙泉公名清字子揚生有異
質語默作止悉中程度父奇之先人種德厚矣祚胤將
在是乎稍長入塾屬對敏而工里人多誦說之會稽金

翁席故貲而朴其媪王上虞方伯女也媪最愛少女謂
翁女貌當貴寧似我作田舍翁婦耶贈公亦聞金氏女
賢使媒妁通言王媪曰耳聞不如目見吾耳祁郎才籍
甚願一見而有明也自往見之喜曰信哉可爲女對矣
遂以女歸公從公封恭人從伯子汝東封太夫人公爲
諸生而父以好施減產太夫人操作供舅姑養與公誦
讀始之以絀織繼之以簪珥公無內顧學滋勤冬夜不
假寐以水盥面父慰之兒何自苦爲拭淚而對曰庶幾
以此獲三釜養大人不墜御史公家聲且二弟未有室
女弟未有家也奚賴焉太夫人復盡以其奩遣小姑而

公文日有名士受業者自遠而至月奉足二人甘毳爲
兩弟具六禮矣歲庚子部使者新安王公都試越諸生
首錄公其年遂登賢書丁未成進士除蜀保寧郡司理
司理不諳刑名寄聽曹掾公日夜取挈令講求之是民
所繇生死也而任胥史高下手耶請讞精明願質成者
屬路重慶賦役法不均吏夤緣侵牟募役金巨萬部使
者下公句校悉發其奸已爲畫便宜役悉以募募悉以
常賦量出爲入量入爲出民便之今所名一把連其遺
法也邑令有嚴繩下而傲事上者爲滌惡民所持三司
理訊之兩人相仗莫敢發公勃然見乎色曰冠雖敝不

以苴履華門圭竇之人而陵其上大亂之道也察見淵
魚不祥令所坐薄乎云爾何至如奸民言而阿邑上意
以屑越名義且成人之過乎卒出令上官知其然更重
公也治行爲蜀諸郡最徵拜南京禮科給事中時北苦
禦虜而南患倭軍興費誦公䟽言弊在三冗舊制各門
闕庫局內臣財正副兩人今動以百十則官冗各監局
匠良工可一二數而歲支粟溢二萬則食冗 孝陵與
諸衛官軍伍缺糧存卽伍存十九老弱則兵冗第就南
京論耳中外類此者覈而汰之可足食足兵
上納其言著爲令咸寧侯仇鸞怙寵而驕詔主宴夷托

疾不出公數其罪狀大不敬無人臣禮疏至鸞已死聞者避之藩臣貪而驟躋卿貳露章彈劾夫大臣民之表也不可以匪人負乘使賢豪解體朝論以爲允而其人

有與援噉公出知福州倭且至四境之民爭門而入或下令毋內民公不可聞之城以盛民而毆民與倭乎亟內之活數萬人身乘城固守倭稍引去民中寇室如懸磬而治兵轉餉崇城浚隍諸役畢與公爲調劑萬端民得無重困會父喪去官已艾矣哀無常幾毀母慰之兒朱綬而橫金父猶布衣何以瞑地下目復不爲母地耶公乃起終喪除韶州守未朞月擢貴州副使部都勻會

楊進雄故立猶子珂爲後後有子欲殺珂相格鬪珂據六洞以叛某開府議舉兵滅之公曰此可計禽耳召裨將薛近宸陰除其黨數輩而使諭珂珂感泣自縛詣吏旣而王世麒以清浪叛宋廷武宋驚以草塘叛王阿利以平代叛衆議兵所宜先公曰世麒自父逆節漏誅宜首聲罪致討宋禍起爭襲阿利負固以偏師間道取之毋庸大舉開府吳公陳公如其言夷皆平上功于朝賜白金文綺三載考最賜爵二人已遷湖廣叅政部辰州西控黔諸夷而南蔽武陵沅湘城圯可褰裳而登也公慮材鳩傭量功命日簡材官之良者董其事閱月萬雉

翼然矣五開銅鼓諸衛爲滇蜀孔道而供億取給楚粟
五溪險惡舟多敗客至無所問廩餼滯淫不得發公請
易徵金更爲規制俾垂久遠踰年奉表賀萬壽諸郡邑
醵金爲公發幣資公謝而麾諸門外入仕二十餘年未
嘗以一名紙通朝貴人柰何煩二三有司還治無何遷
山東按察使便歸省母請曰兒以母命不卽死得徼一
官及父于願足矣乞就田間終事母母艷然兒幼須乳
耶抑虞我老有如此不可諱耶我健不啻兒且有諸弟在
仕者處者養我一也濡遲久之迺行至山東爰書度閣
累千驗問傅生比者以百數東人歛然誦之已大比文

士復比武士復大計吏部使者倚重公所去取悉諧士
論符民心而坐勞勩疾矣尋遷陝西右布政使復欲自
免母勅家人子勸駕且促之秦會左伯上計公爲政方
有事西虜徵發如雨出納明審筦鑰吏捧手莫得一言
而公病滋深不一月卒矣疾時應發帑金故事有奇羨
所親來問疾語公第一署名可得千金爲子女婚嫁地
公厲聲卻之位登方伯孰與爲諸生時古人有清白遺
子孫者吾何獨不然疾革語夫人策名委質身屬公家
死秦死越等耳獨令母哭子長恨九泉善事母吾目瞑
矣伯子方偕計吏惟諸孫輩在夫人顧視篋中無以爲

斂里人王公陳臬於秦言之諸臺皆曰祁公廉至此何
讓孫叔敖吾輩爲其子孫謀寧不如優孟相率致賻而
歸恭人衰年失子意忽忽如有失夫人率諸孫破泣故
爲歡端解之旣歸取公所遺衣履諸物以分二叔曰先
君子生平有言人情自爲勝於爲弟爲子勝於爲弟之
子吾所不能非博孝友名率性而已再拓先世宅推與
兩弟未亾人何敢負亾者兩弟之歸也余食貧手結采
以聘今差增于往而居薄乎恭人聞之愈忘亾也日聚
諸子婦而教之以勤儉聚諸孫而扃諸樓中聽其伊吾
聲高下徵勤惰焉或五月不出戶旣以伯子晉太夫人

而詔諸子婦若孫婦吾始者爲諸生婦值中葉良苦而
不知憂舉四子少者有文不幸早世而無憂如故也其
後爲貴人婦爲母爲王母而不知逸于今稱夫人於婦
秩最尊諸孫以孝廉拜我膝下年八十有奇而無逸如
故也視六十餘年事如一日下從先君子可無愧色乎
公晚年有妾媵夫人恣柔愛之道又好施無遺蓄尤虔
于宗廟之祭雖大羞飲噉不衰獨目少眊而季孫舉孝
廉者以足疾天癸婦沈事姑孝夫人最所鍾情兩妾相
守不去左右婦復病肺不起而夫人哭孫與婦後兩旬
而卒公沉靜有檢局人莫窺其際臨事惟義所在利害

毀譽莫能奪分宜當國兩京臺省奔走其門公遇之殊
踈所建白多犯所忌以此一麾出守同榜陶宗伯公爲
南臺每稱公招不來麾不去君子哉若人也在黔有軍
功而所知居政府或諷公小結納可致開府公哈而笑
此吾爲夕郎時所論藩臣驟陟卿貳事也子爲我願之
乎在蜀識漢川宋公繼祖兄弟羅之幕下親受業如弟
子知己之感言爲下涕而公未嘗語人也在山東所識
拔士亦然生平好陸敬輿文南省章數十上文殊似之
而每焚其草其不競榮利不標聲迹如此公生正德庚
午卒隆慶庚午年六十有一太夫人生正德戊辰卒萬

曆甲午年八十有七子四人孫五人曾孫十三人玄孫
六人孫女三人曾孫女七人玄孫女六人伯子汝東兩
淮都轉運使婦王封恭人太學生材女潮州守南湖公
孫也仲子汝懋襄陽縣簿婦馬泗州別駕堯讓女叔子
汝森贈長洲縣令婦沈贈孺人英德令梗女卽先夫人
卒者也季子汝杰諸生婦劉太學儺女少司馬良所公
孫也汝東子承輝國子生婦虞諸生唐女承燧辛卯舉
人婦胡按察使邦奇女汝森子承燦甲辰進士今爲兵
部郎初聘兵部郎王應吉女駕部龍溪公孫未行而卒
娶于王封孺人太學鍾瑞女南雄別駕白溪公孫也承

勲國子生婦金興化郡博鍾女汝懋子承燬府知事婦
樓守道女繼謝昺女孫女適封刑部主事劉聖子松江
府經歷彥者汝東出也適光祿署丞商濬子國禮大理
少卿燕陽公孫者森出也適景陵縣簿錢公沐子應桔
者懋出也曾孫應吉娶高本達女應龍娶簡州守趙完
女應鶴娶澧州別駕于澄女輝出也麟佳娶建寧別駕
陶嵩齡女方伯晴字公孫鳳佳娶朱朝佐女駿佳聘右
通政朱敬循女文懿公孫彪佳聘給事中商周祚女象
佳幼未聘燦出也豸佳聘京衛經歷馮某女熊佳幼未
聘勲出也應元娶光祿署丞屠某女燿出也應斗聘葉

佐女應魁聘武進士陳某女燬出也龍鶴麟鳳駿豸俱
諸生斌斌不愧其名矣曾孫女適胡芳明子州別駕會
隆適順天別駕吳有豸子孟春輝出也適潮州別駕何
景憲子繼洪大司寇沅溪公孫燦出也適奉議州別駕
戴國子某適汀州檢校何景員子繼某燬出也適太學
生史某子某幼未字勲出也不佞以公登第之歲生得
見公京師公忘年而體貌之有加常等于心終不忘比
從爾光游甚驩其爲公與夫人狀四千餘言爛然有第
已讀累世所奉勅誥若干篇與銘表之文皆名公卿筆
越誠多世家不數僕指矣爾光謬屬不佞志愧無能爲

役顧于情誼不得辭詮次而志之如右爾光承燦字也
 葬公邑之天樂鄉資壽山中夫人祔焉銘曰峯嶸隆峻
 吐納雲霧潭壑鏡徹清流瀉注是為山陰地靈所聚鍾
 美于人祁公斯賦太華之山削成四方高五千仞仰摩
 穹蒼祁公分陝如彼顛叩考終在茲與神翱翔為孝為
 弟為廉為直大閑小物古訓是式書生文弱而領兵職
 幄帳運籌以戰必克事任其難賞任其薄不忮不求無
 怨無怍刑于伉儷率由架護含章代終鳴陰和鶴八命
 作牧六十日耆所不盡享後昆受之聞孫武庫敦禮悅
 詩顯揚祖考竹帛鼎彝墓中之石徵銘舊史不腆部民

備聞素履輿誦鄉評昭哉可紀公無愧詞史無虛美

河南左叅政吳公舒恭人墓誌銘

嘉靖之季歷下李于鱗太倉王元美長興徐子與南海
 梁公實廣陵宗子相與興國吳明卿六先生者講業京
 師中各為五子詩海內因其詩稱五子云六先生交誼
 矢生歿不相負而梁宗最蚤世李踰艾徐王踰耆千里
 炙絮不期而會誅輓志狀非其黨莫敢任者而吳先生
 先一歲喪繼室舒恭人厝百里峰之麓身視作斥上虛
 左以明同穴之信旁為祠題其柱曰陶元亮屬自祭之
 文知生知歿劉伯倫荷隨行之鋪且醉且醒明年先生

登七十四方賀者屢不絕於戶時語二子事小定當爲
而母志且自爲誌無何遂卒而題柱語成讖矣於是垂
倩臯倩卜以某月某日葬先生於舒恭人左而使某代
匱供誌墓之役先方伯公同先生薦南宮交最稔幸以
父執事先生三十餘年先生解大梁組十三年而某繼
之所睹記行事爲詳卽文莫猶諸先生夫亦吾黨之小
子也謹爲志其崖略曰先生蓋延陵之裔明興有賢忠
者自嘉興徙興國四傳而爲邵武公嚴配李恭人是爲
先生父母先生生而知慧不羣日誦萬言無忘伯兄國
佐奇之國佐善賈賈饒則更力田以其貲佐先生讀又

好相人嘗曰必季氏能高大吾門亦必陳處士廷章女
克相季氏從史翁媪爲先生委禽于陳比陳恭人歸而
國佐已先亡家中落陳恭人解其裝送購書佐讀如伯
氏時而先生疎蕩間從少年爲擣蒲戲恭人取其具焚
之先生益感奮下帷討論六籍百氏靡不綜貫所論誤
必法古咎矣居頃之邵武公李恭人相繼卒已酉免喪
舉湖廣鄉試第一人明年成進士先生之舉第一大司
馬王司直公爲御史實識之司直者元美先生父也先
生繇此與五子齊名而分宜執政陽浮慕諸文士除先
生中書舍人入內閣司誥勅故事舍人直內閣者卽累

官卿貳詘體如佐史先生旣以才特選禮絕其偶而分
宜父子恣睢積不平會陳恭人卒請歸治葬還朝副相
華亭徐文貞重先生志操分宜亦欲先生德已召拜兵
科給事中所彈劾貴幸及論列時事皆分宜私昵與其
宿負而揚忠愍坐分宜故歿交游竄名匿影不敢問先
生與元美諸君子走哭西寺經紀其喪爲六詩輓之語
甚激烈分宜微得狀大恚阿邑

上旨以慧星察朝衆不附已者若干人而先生謫南康
府知事稍遷其府推官南康分宜鄰郡八關五偶舟絡
繹於道監司郡守以下共張迎送酬幣宴貨皆厚而先

生受督學使者檄主白鹿書院教事郡事暇輒坐廬山
與諸生講學論文其黨鄢萬袁彭之屬過南康不得先
生一謁刺交爲蜚語中之賴徐文貞力爭猶以故官調
歸德先生之在歸德請讞益精明而德清蔡司馬南海
龐中丞兩公撫按河南皆有風節推轂先生甚力分宜
故抑之而先生意倦游自免歸歸而分宜敗卽其家擢
同知福建之建寧府尋擢知邵武府治行壹切準於廉
平郡東門火先生趨謁城隍神鬱攸中有雲如縷起四
布雨若屋上建瓴水火遽滅觀者歡呼太守今之劉昆
也三年報政贈父如其官母李與配陳舒俱恭人時蒲

高
三十一
阪楊襄毅爲冢宰夷陵劉司空爲考功郎徐文貞爲首
揆謂先生淹卹在外將有非常之擢而修郤者更安肆
詆謔加非於先生三公持不可調守高州高州嶺東偏
山海之盜麻沸先生至則察吏之貪墨誨盜者匿盜不
以聞者大猾之保納舍藏者信宜茂名電白諸邑與獠
勾連者悉寘於理內盜恐莫有固志轉徙他界桴鼓不
鳴而倭奴擁衆薄城城守單弱先生噢咻其衆衆爲感
泣登城畫地而守入呼家人與別乃公誓滅此朝食不
得顧妻子矣獨楮其生平著作授健幹曰脫有不可知
以此之太倉付王公處分耳郡人覘先生無二心守益

堅倭引還先生躍馬督兵背城二十里拒之倭已醉望
郡公黃蓋忽忽不知所出棄壘而遁適陳將軍從間道
來會於里麻衷倭而擊之所斬獲無筭前後以距倭功
下金幣褒者三三歲擢貴州督學使貴州介在西南夷
士學鮮師承先生科條寬嚴相得士瞿然顧化擢叅知
河南政事分部大梁大梁先生舊游民之情僞盡知之
矣每一令下驚嘆若神其大指在寬文罔與民休息有
進士爲邑令頗不飾簠簋案治免官提調大比士所識
拔類多異才江陵爲翰林時故爾汝交比相意氣有加
於管而先生以郡守上計及爲叅政入賀不亟見見復

談笑自若江陵不善也屬大計臺臣當糾給事之爲外
僚者某子甲某子甲去給事非久所知爲營解而里人
與先生故同給事者方居大官銜先生嗤其椎魯嗾臺
臣以江陵指論先生先生不免矣歸爲文告其先墓曰
某自今以往得長守丘壠備掃除是彼其之子有大造
某也世謂詞人不達政而先生領五郡佐藩臬簿最詳
繳老吏見者咋舌又能以經術緣飾之表章往哲風勸
後人若新洗夫人廟易微子祠曰上公治太昊陵其著
者也宦三十年橐無餘貲初營一第城中盜入遺火悉
爲煨燼復構文本園以居苦貧鬻去而北郭獅山之陽

有蔬圃湖水環之先生曰寢丘可處豈必好時哉導湖
水爲池池中爲三山曰壺嶺而中爲甌甌洞湖之中有
亭曰狎鷗總名之曰北園興國之有園自先生始園故
郊坳間饒山水而益以先生勝客過從無虛日先生稱
其家有無與客共之千古之上六合之外抵掌揚扈連
日夕不休海內薦紳布衣學士羔鴈玄纁不東走弁州
則西走甌甌矣先生貴不逮養父母每受命望故鄉醮
祭若過家上冢歲時修祠事泣數行下生忌辰謝客不
舉觴而念邵武公李恭人以士禮葬且地卑濕改宅兆
蓮華山封樹守舍甚具至質子錢家爲之無所靳伯兄

蚤世葬地亦不吉徙諸陳恭人墓右而擇谿南王玉甫
山葬其子道良夫婦又葬其丘嫂陸及其子婦而飲食
教誨其存者仲兄國典年八十叔兄國化七十有五先
生事之甚恭盛夏具衣冠率子姓拜牀下汗浹沾背弗
已叔兄先生一月卒先生哭之慟先生沒後六日仲
兄卒蓋脊令義敦相繼爲地下遊矣其他若同業友之
逋上供者久弗葬者故人孫被掠者傾橐資之里人誦
義無窮隆慶初某從先生遊京師邸中閱四月他日謁
座主殷宗伯歸告先生曰宗伯橫金而素何也先生莞
爾而笑曰犀也出越董生篆刻印章於案試籌其直若

何某對曰鄉索之長安市中一字一錢耳先生復爲一
粲佳公子而僮父乎厨人取小鮮爲鮓以進座客嘗不
竟匕某遂屬厭先生大笑故鄉之味遇知己矣吾願君
日後富貴毋忘此三事先生不惜齒牙餘論獎進後生
後生爭得其一盼以就聲價晚年負海內盛名人心儀
其不可近而延接愈勤款與閭里浮湛相隨行所過婦
孺噎路窺吳公作何狀嘗相地山中山中人爭告語曰
吳公長者必得吉地安得吉地出吾家吾將以交驩公
乎後果得地而其人不受直十往才納其半其薰然慈
仁人樂就之如是而亦不欲成人過必正色相規非公

事不入州大夫室州大夫嚴重之有秕政懼爲先生所知先生素強無疾晚不邇聲色貌日腴而神日王自舒恭人與叔兄之沒也中忽忽不樂卒之前期爲穆考功文一通王行甫詩六章又爲詩招二子渡江歸而先生寐不起良久微語如常時二子請所欲言卒不應恬然而逝舒恭人者崇陽人父爲乘田吏於中丞劉子成爲中表戚中丞善先生因以繼先生室恭人家故豐而入門爲貴人婦然以生不逮事舅姑服御食飲務去穠鮮先生歷閩粵夜郎間關萬里中更兵燹饑饉緩急非一恭人無愠色而時時從官舍中間答杖聲慘然不樂先

生爲是省于刑其後家居歲入不足更費恭人委曲措辦先生莫知所從出而自其少歸不以昵愛肆姐相敬迄艾無衰先生失恭人如失左右手爲悼亡詞甚哀荀粲之情死寧獨少年又寧以色故耶恭人有姊助陳恭人之遣蚤卒懼舒氏之鬼餒也祠諸其家之別室先生名國倫字明卿別號南嶽山人嘉靖甲申正月二十有二日卒萬曆癸巳六月二十有三日年正七十所著甌甑洞藁及續藁百萬餘言行於世舒恭人生嘉靖壬寅正月二十有五卒萬曆壬辰七月晦日年五十有一葬以癸巳某月某日陳恭人別葬鶴山生卒行事具

徐子與先生誌中男三人女一人伯工良字垂倩郡諸生娶廣濟諸生呂一純女次牧良長殤娶祁州判官劉守質女亦殤次士良字臯倩太學生娶刑部員外郎徐文徵女生子二曰雍曰廩娟秀警悟先生聞其讀書聲擊節和之引滿至醉以爲常女適呂文簡公子興武有外孫三人男曰同女曰瑜曰某垂倩臯倩秀美而文不忝先生子矣臯倩述先生事而門人王行甫爲狀語大同小異今天下無知不知類以文士目先生而其孝友仁讓與當官不畏強禦力行清潔處脂膏不自潤乃爲文名所掩其評先生文者惟許相國以五子相提而論

謂先生爾雅王司寇挈楚之才士王稚欽顏廖童張孫氏父子而無爲先生偶者百世之下不易斯言矣始李恭人大期時鄰有夢雲中昇天書造吳翁門者已而先生生六先生三無後僅元美位尚書徐李小過之此日及華耳而稱老惟先生一人天之所授非苟而已銘曰南嶽衡山踞離宮上館赤帝下祝融朱鳥翊翮翼軫翀天苞地符人文鍾重黎火正嗣老童淳耀惇大天地功子孫章章有鬻熊是爲子始儒者宗墳典丘索渾噩風左史倚相口成誦丘明靈均實比蹤宋玉景差亦其朋元氣淋漓垂欲窮闕閔千載得吳公吳公自署南嶽封

玄夷蒼水使者逢授以金簡書一通

蕭皇肇楚楚鎬豐綢繆禮樂始衷終不先不後丁我躬
中原五子類相從餘者碌碌若沙蟲佩九畹蘭扈營藟
雲夢八九吞其胃如椽之筆手罄控片言隻字成赧虹
旁羅今古棟宇充粲然江妃漢女容矯然黃鵠摩蒼穹
洞庭張樂聲淪淪湘靈時復奏孤桐隋珠荆璧世少雙
岫巖禹碑開鴻濛陽春爲燠白雪冬郢斤運風風何雄
花鳥愁泣鬼神恫真宰披抉萬象空投畀人間讒口攻
日南夜郎夷若戎奔播道路逐飛蓬魍魎與射工
射之烏號楚人弓跳盪萬里無衡鋒弋者誰篡冥冥鴻

壺嶺神瀆流淙淙菟裘故與龍門同詆蕩天門窺九重
呼吸聞帝帝失聰甌甌洞中七十翁宇宙苦女曹牢籠
婁江頃已收吳儂女勿逋余南嶽共余改命女主芙蓉
乘彼白雲照燭龍藏女遺蛻百里峰有偶如鳳鳴雖離
馬鬣歸然國駿龐英氣魂魂光熊熊

大泌山房集卷之

大泌山房集

卷之

九十二

墓銘四十三

南皇學苑楚錦豐綢繆禮樂始衷終不先不後丁我身
中原五子類相從餘者碌碌若沙蟲佩九畹蘭扈營藟
雲夢八九吞其胃如椽之筆手盤控片言隻字成赧虹
初羅今古棟宇充架然江妃漢女容矯然黃鶴摩蒼穹
馮諼讀然因魏韻英隸駘駘米顛顛所珠荆璧世少雙
乘舟白雲飄飄風蕭蕭文書馳百里率有嘶啾鳳鳥鳴
翼玉郎日外吳艤文以直余南嶺共余如命文主芙蓉
平如開帝帝夫颯颯隨風中十餘字宜苦文曹宋辭
壺巖嶺驚流宗宗莫莫姑與諧門同若蕙天門窠其竟

大泌山房集卷之九十三

京山李維楨本寧著

雲南按察司副使孫公嚴宜人墓志銘

明興家世擅雕龍之慶者在楚有華容孫氏為洞庭漁
人宜山人斯億斯億弟博士斯傳與其子吉士羽侯海
內籍籍誦之而有開必先則觀察石磯公也石磯公諱
繼芳世其其字父榮領成化癸卯鄉薦歷信陽州守遷
同知處州府以循吏稱娶劉宜人是為忠宣公妹公兒
時穎敏日誦千言善屬舉子業父守信陽遣從何舍人
仲默學年二十四舉於鄉遊太學師呂仲木故其治經

